

尚書今古文注疏

尙書今古文注疏序

賜進士及第加授通奉大夫山東督糧道孫星衍謹撰  
書有孔氏穎達正義復又作疏者以孔氏用梅賾書  
于廿九篇析亂書序以冠各篇之首又作偽傳而舍古  
說欽奉

高宗純皇帝鑒定四庫書採梅賾閣若璩之議以梅氏  
書爲非真古文則書疏之不能已于復作也兼疏今古  
文者放詩疏之例毛鄭異義各如其說以疏之史遷所  
說則孔安國故書大傳則夏侯歐陽說馬鄭注則本衛

宏賈逵孔壁古文說皆有師法不可遺也今古文說之不能合一猶三家詩及三傳難以折衷卽鄭注三禮亦引今古文異字及鄭司農杜子春說至晉已後乃用李斯別黑白而定一尊之學獨申已見自杜預之注左傳王弼之注易郭璞之注爾雅濫觴也經廿九篇并序爲卅卷者伏生出自壁藏授之鼂錯教于齊魯立于學官大小夏侯歐陽爲之句解傳述有本後人疑爲口授經文說爲畧以其意屬讀者誤也孔壁所出古文獻自安國漢人謂之逸十六篇後漢衛宏杜林賈逵許氏慎等

皆爲其學未有注釋而經文并亾于晉永嘉之代不可復見也書大傳孔子謂顏淵曰堯典可以觀美禹貢可以觀事咎繇謨可以觀治鴻範可以觀度六誓可以觀義五誥可以觀仁甫刑可以觀誠凡此七觀之書皆在廿九篇中故漢儒以尙書爲備又以爲法斗七宿四七十二八宿其一斗也又云孔子更選二十九篇二十九篇獨有法也尋此諸說卽非正論可証漢儒之篤守廿九篇無異辭也廿九篇析爲三十四篇者伏鄭本分合之不同大誓後得然見于史記書大傳似止上下二篇

至唐已後并失之其詞見于傳記猶可徵也書大傳存本亦爲後人刪節馬鄭注至宋散佚王應麟及近代諸儒或從書傳輯存之故可附經而爲之疏也文有今古之分者孔壁書科斗文字安國以今文讀之蓋秦已來改篆爲隸或以今文寫書安國據以讀古文其字則異其辭不異也司馬氏用安國故夏侯歐陽用伏生說馬鄭用衛賈說其說與文字雖異而經文不異也古文篆籀之學絕于秦漢聲音訓詁之學絕于魏晉典章制度之學絕于隋唐尙書爲唐虞三代之文字蹟奇古詁訓

與後世方言不同制度或在禮經之先後人不考時代  
率爲之注解致訓故乖違句讀舛誤謂之佶屈聱牙殊  
可歎也孔氏之爲書正義序云据蔡大寶巢猗費彪顧  
彪劉焯劉炫等又云覽古人之傳記質近代之異同存  
其是而去其非削其煩而增其簡是孔氏之疏不專出  
于已今依其例徧採古人傳記之涉書義者自漢魏迄  
于隋唐不取宋已來諸人注者以其時文藉散亾較今  
代無異聞又無師傳恐滋臆說也又採近代王光祿鳴  
盛江徵君聲段大令玉裁諸君書說皆有古書証據而

王氏念孫父子尤精訓詁但王光祿用鄭注兼存僞傳  
不載史記大傳異說江氏篆寫經文又依說文改字所  
注禹貢僅有古地名不便學者循誦段氏撰異一書亦  
僅分別今古文字及惠氏棟宋氏鑿唐氏煥俱能辨証  
僞傳莊進士述祖畢孝廉以田解經又多有心得合其  
所長亦孔氏云質近代之異同存其是而削煩增簡者  
也爲書始自乾隆五十九年迄于嘉慶廿年既有厥逆  
之疾不能夕食恐壽命之不長亟以數十年中條記書  
義編纂成書必多疏漏謬誤之處然人之精神自有止

境經學淵深亦非一人所能究極聊存梗概以俟後賢  
或炳燭餘光更有所得尙當改授梓人不至詒譏來哲  
也嘉慶二十年太歲乙亥二月中旬序于金陵冶城山  
館



尚書今古文注疏凡例

一此書之作意在網羅放失舊聞故錄漢魏人佚說爲多其前哲編纂書義具有成書或列在學官或爲時循誦不敢勦說雷同

一尚書古注散佚今刺取書傳升爲注者五家三科之說一司馬氏遷從孔氏安國問故是古文說一書大傳伏生所傳歐陽高大夏侯勝小夏侯建是今文說一馬氏融鄭氏康成雖有異同多本衛氏宏賈氏逵是孔壁古文說皆疏明出典其先秦諸子所引古書

說及緯書白虎通等漢魏諸儒今文說許氏說文所載孔壁古文注中存其異文異字其說則附疏中大傳于章句之外別撰大義故擇取其文不能全錄

一經文相傳既久謹依孔氏穎達正義本參用唐開成石經卽今世列學官循誦之本若改從古文便恐驚俗止注明文字同異疏其出處惟堯典分出舜典臯陶謨分益稷書序一篇分列各篇之首前人俱以爲非不得不改從舊本以符廿九篇之數盤庚等三篇爲一依漢石經每篇空格及秦誓用史記參以書大

傳不敢湊集佚文說俱見疏中

一尙書佚文見于先秦經傳諸子及漢人所引有篇名可考者各附書序竝存原注其僅稱書曰書云者或不必盡是尙書或是逸周書及周書六弢不便採入惟孟子所引似是舜典趙注不爲注明亦不敢據增一曰時諸君之說有已刻行世之書亦有未經授梓者有雜載經義札記者故須採附經本以諗來學俱載明姓氏其不載者或因引據書傳爲習見之文或與拙撰舊稿暗合是以略之非敢掠美

一緯書言三百年斗歷改憲古時歷法夏殷周魯已有不同今既注經須用考靈耀及淮南天文訓史記歷書天官書漢書律歷志等引證方與先秦歷法符合六朝唐人如祖沖之僧一行異說或用梅氏書允征大甲等篇考証年月殊不可信西法雖密與古不同亦不足爲經証

一禹貢地理俱用古說見于漢地理志當時據周地圖桑欽等書說後人以臆見移易山川如以成臯大伾爲在黎陽以安豐大別爲在漢陽之屬皆不敢濫從

郡縣應釋以今名方便學人檢閱庶補江氏聲所未備

一引用各書其爲本書不具及今世所無之本俱載明出處說文用宋本或載他書引用異文惟家語孔叢小爾雅神異經搜神記等或係僞書或同小說不敢取以說經疑誤後學

一宋本注疏注爲雙行小字明本或以注爲單行疏爲雙行汲古閣本始以注爲中字疏爲雙行小字行世甚廣今依其式如邵氏晉涵之注爾雅或有可採以

書政戶例  
三  
便附入經疏

一此書初始于乾隆甲寅年至嘉慶乙亥年迄功付刊  
中閒歷官中外牽于人事雖手不釋卷懼有遺忘多  
藉同人之助台州洪明經頤煊文登畢孝廉以田上  
元管秀才同助其搜討同里臧上舍鏞堂從弟星海  
助其校讎應行附錄

堯典第一上 虞夏書一

賜進士及第授通奉大夫山東督糧道加三級孫星衍

**堯** 大傳說堯者高也饒也馬融曰堯諡也翼善傳聖曰

**堯** 大傳說見風俗通皇霸篇引書大傳以堯為高者

優游博衍衆聖之生百王之長也說文云堯高也从垚

在兀上高遠也古文作堯云饒者與高聲相近廣雅釋

詁云益也多也饒多之義猶舜之言充俱美詞馬注見

釋文云堯諡也翼善傳聖曰堯者士冠禮云死而諡今

也古者生無爵死無諡注云古謂殷殷士生不為爵死

不為諡則鄭以此禮為大夫士言之不謂天子則古者

天子有諡故馬氏以為諡也白虎通諡篇云帝者天號

也以為堯猶諡願上世質直死後以其名為號耳所以

諡之為堯何禮諡法曰翼善傳聖諡曰堯馬氏說本此

高誘注戰國策亦引堯舜諡張晏注漢書同今諡法解

無文者後人刪之裴駰史記集解亦引諡法與馬同也  
堯名放勳又以堯為名者此名即號非若前臣名之名  
由民稱號之故鄭注中候云重華舜名又注禮記云舜  
之言充也堯之為高為饒亦猶舜之言充春秋繁露三  
代改制質文篇云軒轅謂之皇帝因存帝纘項帝嚳帝  
堯之帝號絀虞而號舜曰帝黃帝之先諡四帝之後諡  
何也帝號尊而諡卑故四帝後諡也則漢人謂顓頊嚳  
與堯皆諡也蓋云軒轅黃帝諡在帝之先帝顓頊等諡  
在帝之後耳此皆上世之以生號為死諡也典者爾雅  
釋詁云常也釋言云經也楚語申叔時曰教之訓典章  
昭注云訓典五帝之書也是其稱在孔子序書之前說  
文典从冊在六上尊閣之也一曰典大典也莊都說古  
文作籒大學篇引作帝典案堯典一篇梅賾所上偽孔  
傳分慎徽五典已下為舜典案百篇之書自有舜典至  
後亡逸不宜以堯典分篇也據孟子萬章篇引堯典曰  
二十有八載放勳乃徂落云云論衡書虛篇云堯典之  
篇舜巡狩東至岱宗南至霍山云云皆在今舜典中明  
古合為堯典淮南秦族訓云堯治天下七十載四岳舉



舜而薦之堯堯乃妻以二女以觀其內任以百官以觀其外明慎徽五典與今堯典嬾于虞文相連也書疏云鄭王皆以舜典合於此篇今并之以復古題堯典第一者書疏云檢古本并石經直言堯典第一題虞夏書者書疏云馬融鄭元別錄題皆曰虞夏書以虞夏同科說文引唐書稷三百有六句又引唐書五品不遜則古文以堯典爲唐書書大傳亦題曰唐傳今不題唐書者從馬鄭本也書今古文注疏大題在下者古書體例皆然儀禮士冠禮在上儀禮在下毛詩周南關雎在上毛詩國風在下毛詩疏云鄭注三禮周易中候尚書皆大名在下馬季長盧植之徒其所注者莫不盡然案史漢三國亦皆如是故用其例

曰若稽古帝堯曰放勳准史遷說帝堯者名放勳馬融

曰順考古道放勳堯名鄭康成曰稽古同天言能順天

而行與之同功曰一作粵勳一作勳疏經將述堯盛德先言稽古者春

秋繁露楚莊王第一云春秋之道奉天而法古故聖者  
 法天賢者法聖後漢書范升傳升奏曰臣聞主不稽古  
 無以承天太平御覽八十一引考河命云若稽古帝舜  
 曰重華欽翼皇象詩殷武疏引契握云若稽古王湯既  
 受命興由七十里起詩譜引撻雛貳云曰若稽古周公  
 旦文選揚雄劇秦美新云故若古者稱堯舜威侮者陷  
 桀紂是聖人為政必先稽古也堯稱帝故謂之同天論  
 語子曰惟天為大惟堯則之張戴注魯靈光殿賦粵若  
 稽古帝漢祖宗云若順也稽考也言能順天地考行古  
 之道者帝也案本經臯陶謨云曰若稽古不得訓為同  
 天者白虎通號篇引禮記謚法曰德象天地稱帝詩商  
 頌云古帝命武湯傳云古帝天也周書武穆解云曰若  
 稽古昭天之道上既云古下又云天明古義不得兼天  
 由禮云措之廟立之主曰帝注云同之天神五帝德  
 故生時稱帝至夏殷生稱王入廟稱帝史記殷本紀云  
 周武王為天子其後世貶帝號號為王然則自周以來  
 廟主始不復稱帝也史公說見五帝本紀漢書儒林傳  
 云司馬遷從安國問故遷書所載堯典禹貢洪範

金滕諸篇多古文說云放勳堯名者大戴禮五帝德宰  
我問孔子曰請問帝堯曰放勳孟子萬章云放勳乃祖  
落注云放勳堯名春秋繁露煥煥教多篇引同孟子勝  
文公篇引放勳曰勞之來之白虎通篇引中候曰天  
子臣放勳知放勳爲堯名也馬注見三國魏志云順考  
古道不云同天者魏志云賈馬皆同以若爲順者爾雅  
釋言文若如音俱近順假借字也稽爲考者見文選張  
載注楊雄文鄭注見魏志及書疏稽古同天書疏作稽  
同古天後漢書李固傳注引作稽同也古天也言能同  
天而行者帝堯以稽爲同者周禮小宰職云稽合也說  
文云同合會也則稽義近同古爲天者周書周祝解云  
天爲古樂記云久則天古猶久也或鄭亦以帝號同天  
起義大誓云正稽古召誥云面稽天若又云其稽我古  
人之德故鄭推以釋此鄭注虞舜以舜爲名則此注亦  
當云堯名文不具也堯亦爲名者正如白虎通所云上  
世質直死後以其名爲號耳此名是時人尊奉之名若  
成湯生卽號爲武王故死後可以爲諡與姓名之名不  
同也放釋文徐云鄭如字蓋因僞傳讀爲放依而明鄭

之不從其義也曰作粵者李賢注後漢書李善注文選  
多引曰作粵或今古文異字然說文粵引周書曰粵三  
日丁亥不引虞書則此作曰古文也說文  
勳古文作勛又引勛乃殂蓋孔壁古文也  
**安注**馬融曰威儀表備謂之欽照臨四方謂之明經緯

天地謂之文道德純備謂之思鄭康成曰敬事節用謂

之欽照臨四方謂之明經緯天地謂之文慮深通敏謂

之思思一作塞安安一作晏晏**疏**馬注見釋文周書論

欽照臨四方曰明經緯天地曰文道德純一曰思是馬

所本也表疑悉字之誤鄭注見書疏云敬事節用謂之

欽者釋詁云欽敬也明與馬同云慮深通敏謂之思者

洪範云思曰睿漢五行志集注云睿古文作睿河間獻

王德傳集注獻深也通也思作塞者後漢書郵傳傳云

塞晏之化論衡恢國篇云唐之晏晏舜之烝烝魏受禪

表云欽明文塞後漢書馮衍及第五倫陳寵傳注引尚書考靈耀俱作文塞晏晏邳惲傳注引鄭注尚書考靈耀云道德純備謂之塞寬容覆載謂之晏蓋思塞聲相近塞即塞假借字也爾雅釋訓云晏晏柔也安晏通字左傳安孺子漢古今人表作晏孺子思作塞安安作晏晏皆今文也

**允恭克讓**

**注**史遷說

為富而不驕貴而不舒鄭康成曰不懈于位曰恭推賢尚善曰讓讓一作攘

**疏**

允者釋詁云信也克者釋言云能也讓本字作攘漢書藝文志

云合於堯之克攘說文云攘推也以讓為相責讓則讓假借字史公說為富而不驕貴而不舒者中庸篇云富有四海之內舒者釋言云緩也大傳五行傳云視之不明厥咎茶舒與茶通緩義近慢也鄭注見書疏云不懈于位曰恭推賢尚善曰讓者詩韓奕云夙夜匪解虔共爾位共同恭鄭用其義晉語文公曰讓推賢也荀子成相篇云堯讓賢以為民讓賢推德天下治是也

**光被四表格于上下**

**注**鄭康成

曰言堯德光耀及四海之外至于天地所謂大入與天地合其德與日月齊其明書說云日照四極九光東日  
日中南日日永西日宵中北日日短光照四十四萬六  
千里又云日道出於列宿之外萬有餘里正月假上八  
萬里假下一十萬四千里又云地與星辰四遊升降於  
三萬里之中春則星辰西遊夏則星辰北遊秋則星辰  
東遊冬則星辰南遊地有四遊冬至地上北而西三萬  
里夏至地下南而東復三萬里春秋二分則其中矣又  
云天從上臨下八萬里天以圓覆地以方載光一作積

一作廣格一作假

**疏**

鄭注見詩噫嘻疏以光爲光耀也鄭用考靈耀說不從今文廣被也

四表爲四海者据德所被言之云所謂大人云云易乾卦詞也書說見開元占經引考靈耀又見周禮大司徒疏及太平御覽三並博物志云四極九光者月令疏引考靈耀云萬世不失九道謀鄭注引河圖帝覽嬉云黃道一青道二出黃道東赤道二出黃道南白道二出黃道西黑道二出黃道北日春東從青道夏南從赤道秋西從白道冬北從黑道立春星辰西遊日則東遊春分星辰西遊之極日東遊之極日與星辰相去三萬里夏則星辰北遊日則南遊夏至星辰北遊之極日南遊之極日與星辰相去三萬里以此推之秋冬放此可知文選張茂先勵志詩注引春秋元命苞曰天左旋地右動河圖曰地有四游冬至地上行北而西三萬里夏至地下行南而東三萬里春秋二分是其中矣地常動不止而人不知譬如閉舟而行不覺舟之運也禮記月令疏引考靈耀云一度二千九百三十二里千四百六十一分里之三百四十八周天百七萬一千里者是周天

圓周之里數也以圍三徑一言之則直徑三十五萬七千里此為二十八宿周回直徑之數也然二十八宿之外上下東西各有萬五千里是謂四遊之極謂之四表據四表之內并星宿內總有三十八萬七千里然則天之中中央上下正半之處則一十九萬三千五百里地在其中是地去天之數也云日道出於列宿之外萬有餘里者又見周禮馮相氏疏引下有云五星則差在其內五行大義引白虎通云日徑千里圍三千里下於天七千里今本白虎通脫文云四遊升降者周禮大司徒疏引鄭注云春分之時地與星辰復本位至夏至之日地與星辰東南遊萬五千里下降亦然至秋分還復正至冬至地與星辰西北遊亦萬五千里上升亦然至春分還復正進退不過三萬里故云地與星辰四遊升降於三萬里之中是以半之得地之中也月命疏又引鄭注考靈耀云天傍行四表之中冬南夏北春西秋東皆薄四表而止地亦升降於天之中冬至而下夏至而上二至上下蓋極地厚也解同周禮大司徒疏星辰亦隨地升降月命疏引鄭注考靈耀云夏日道上與四表平下



去東井十二度爲三萬里月令疏釋之云計夏至之日在井星正當嵩高之上以其南遊之極故在嵩高之南萬五千里所以夏至有尺五寸之景也於時日又上極星辰下極故下去東井三萬里也云天從上臨下八萬里者周髀算經云天離地八萬里新序制奢篇許綰曰臣聞天與地相去萬五千里案天離地八萬里故測以八尺之表夏至日在嵩高之南萬五千里故有尺五寸之景許綰据日景測天云與地相去萬五千里皆千里而差一寸也光被卽橫被漢書王莽傳云昔唐堯橫被四表格說文云假至也引虞書此文作假王逸注招魂亦引作假

**克明俊德**

**注**

史遷克作能俊作馴鄭康成

曰俊德賢才兼人者俊一作峻

**疏**

史公說見五帝本紀克爲能者釋詁文俊

爲馴者集解引徐廣曰馴古訓字言堯自明其德以訓九族周禮土訓注鄭司農讀訓爲馴釋以告道引爾雅訓道也是古文說也漢書儒林傳云司馬遷嘗從安國問故遷書所載堯典禹貢洪範微子金縢諸篇多古文

說故以其文釋經也鄭注見書疏以俊德為賢才兼人者春秋繁露爵國篇云萬人曰英千人曰俊百人曰傑十人曰豪說文云俊才干人也故以俊為兼人也鄭意以明為明揚俊德為賢才蓋言九族中之賢才如論語所云汎愛眾而親仁也大學篇引帝典俊作峻釋為皆自明者峻與俊通皆古文自明之義言自明其德則同也

史公以親九族九族既睦注夏侯歐陽等說九族者父

族四母族三妻族二皆據異姓有服古尚書說九族者從高祖至元孫凡九皆同姓馬融鄭康成皆同鄭曰睦

親也疏九族今文為異姓古文為同姓夏侯歐陽說見書疏引異義古尚書說見春秋左氏桓六年傳

疏云今戴禮尚書歐陽說九族乃異姓有屬者父族四五屬之內為一族父子女昆弟適人者與其子為一族己

女昆弟適人者與其子為一族己之女子子適人者與其子為一族母族三母之父姓為一族母之母姓為一

族母女昆弟適人者與其子爲一族妻族二妻之父姓爲一族妻之母姓爲一族古尚書說九族者從高祖至元孫凡九皆同姓謹案禮總麻三月以上恩之所及禮爲妻父母有服明在九族中九族不得但施於同姓鄭駁云元之聞也婦人歸宗女子雖適人家猶繫姓明不得與父兄爲異族其子則然婚禮請期辭曰唯是三族之不虞欲及今三族未有不億度之事而迎婦也如此所云三族不當有異姓異姓其服皆總禮雜記下總麻之服不禁嫁女取婦是爲異姓不在族中明矣周禮小宗伯掌三族之列名喪服小記說服之義曰親親以三爲五以五爲九以此言之知高祖至元孫昭然察矣據此知許氏從今文鄭氏從古文說也詩葛藟序云周道衰棄其九族傳云九族者據己上至高祖下及元孫漢書高帝紀七年置宗正官以序九族是漢初俱以九族爲同姓夏侯歐陽說爲異姓者蓋因堯德光被自家及外族鄭不然者以經文下云百姓可該異姓也馬鄭注見釋文又見後漢書班固傳注以睦爲親

平章百姓百

者易釋文引蜀才云睦親也與鄭義同

姓昭明注史遷平作便鄭康成作辯曰別也章明也百

姓羣臣之父子兄弟疏史公作便章者鄭注論語云便

平辨治也鄭作辨注見後漢書劉愷傳注及史記集解

史記索隱云今文作辨章鄭云百姓羣臣之父子兄弟

者周語富辰曰百姓兆民注百姓百官也官有世功受

氏姓也楚語觀射父曰民之微官百王公之子弟之質

能言能聽徹其官者而物賜之姓以監其官是為百姓

鄭說所本也白虎通姓名篇云尚書曰平章百姓姓所

以有百者何以為古者聖人吹律定姓以記其族人含

五常而生聲有五音官商角徵羽轉而相雜五五二十

五轉生四時異氣殊音悉備故姓有百也云辨別者說

文采辨別也辨音近采章明者史記伯夷列傳云此其

尤大章明校著者也協和萬邦黎民於變時雍注史遷

昭者說文曰日明也協和萬邦黎民於變時雍注史遷

協作合邦作國協一作叶變一作蕃一作下疏史公說

疏協為合

者鄭注周禮云協合也下文協時月正日五帝本紀作合時月邦作國者漢書宣帝紀及地理志諸書多作國段君玉裁据白虎通蔡邕石經有國字云漢人詩書不諱不改經字宋書禮志禮部太常寺言漢法邦之字曰國盈之字曰滿止是讀曰邦讀曰滿本字見於經傳者未嘗改易司馬遷史記先王之制邦內畿服邦外侯服又曰盈而不持則傾於邦字盈字皆不改易此說蓋非無見是也後人遇國字卽疑漢人避諱因改爲邦耳萬國者地理志云昔黃帝方制萬里畫楚分州得百里之國萬區故易稱先王建萬國親諸侯書云協和萬國此之謂也鄭注王制云春秋傳云禹會諸侯於塗山執玉帛者萬國言執玉帛則是惟謂中國耳中國而言萬國則是諸侯之地有方百里有方七十里有方五十里者禹承堯舜而然矣要服之內地方七千里乃能容之協論衡高世篇引經言叶和萬國說文協或作叶於變漢書成帝紀陽朔元年詔引作於蕃注應劭曰黎衆也時是也雍和也言衆民於是變化用是大和也韋昭曰蕃多也潛夫論考績篇云此堯舜所以養黎民而致時雍

也以養釋蕃云致時雍疑又以時為時代之時案應氏  
釋於為於是則於讀如字於變猶言爰變也釋詁云黎  
衆也爰於也時是也釋訓云靡靡和也漢孔宙碑云於  
下時雍下卽弁之俗字變與蕃聲相近下音近變民漢  
書注師古乃命羲和注馬融曰羲氏掌天官和氏掌地  
一引作萌

官四子掌四時鄭康成曰高辛氏之世命重為南正司

天犁為火正司地堯育重犁之後羲氏和氏之子賢者

使掌舊職天地之官亦紀於近命以民事其時官名蓋

曰稷司徒馬鄭皆曰此命羲和者命為天地之官下云

分命申命為四時之職天地之與四時於周則冢宰司

徒之屬六卿是也

**疏**馬注見釋文云羲氏掌天官和氏  
掌地官者楚語觀射父對昭王曰

少皞氏之衰也九黎亂德顓頊受之乃命南正重司天以屬神命火正黎司地以屬民法唐尚書云火當爲北書疏引鄭荅趙商云先師以來皆云火掌爲地當云爲北正揚子法言云義近重和近黎是鄭所本也云四子掌四時者卽下經文義仲義叔和仲和叔各主一時是也鄭注見周禮序及書疏云高辛氏之世者重黎當顓頊之時旣爲勾芒祝融之官其後卽以重黎爲號故至高辛之世再居此職鄭語史伯對桓公曰黎爲高辛氏火正以淳耀惇大命曰祝融是也黎如此則重可知鄭據鄭語爲說楚語又云其後三苗復九黎之惡堯復育重黎之後不忘舊者使復典之以至于夏商故重黎氏世教天地而別其分主者也注云育長也堯繼高辛氏平三苗之亂紹育重黎之後使復典天地之官義氏和氏是也云紀於近命以民事者春秋左氏昭十七年傳云自顓頊以來不能紀遠乃紀於近爲民師而命以民事謂少昊以前以雲火龍鳥等紀官是紀於遠顓頊以來若稷與司徒是以民事命官故云亦紀於近云其時官名蓋稷曰司徒者以司徒敬敷五教與周禮地官

司徒掌邦教同韋昭注楚語南正重司天以屬神云周禮則宗伯掌祭祀注火正黎司地以屬民云周禮則司徒掌土地民人者也與鄭義何案西漢諸儒用今文說以義仲等四人卽是義和不以爲六官與馬鄭異月令云乃命太史司天日月星辰之行是義和于周爲太史之職也史記天官書云昔之傳天數者於唐虞義和是不以爲六卿漢書成帝紀陽朔元年詔曰昔在帝堯立義和之官命以四時之事令不失其序百官公卿表云書載唐虞之際命義和四子順天文授民時注應劭曰堯命四子分掌四時之教化也張晏曰四子謂義仲義叔和仲和叔也食貨志堯命四子曰敬授民時魏相傳云明王謹於尊天慎於養人故立義和之官以乘四時節授民事論衡是應篇云堯候四時之中命羲和察四星以占時氣是以仲叔等四子爲義和今文說也

若昊天

**注**

史遷欽若作敬順今文歐陽說春曰昊天夏

曰蒼天秋曰旻天冬曰上天總曰皇天古文說天有五



號各用所宜稱之尊而君之則稱皇天元氣廣大則稱

昊天仁覆閔下則稱旻天自上監下則稱上天據遠視

之蒼蒼然則稱蒼天

**疏**史公欽為敬者釋詁文若為順者釋言文今歐陽說及古文說

見詩黍離疏及周禮大宗伯疏許氏謹案尚書堯命義和欽若昊天總勅四時知昊天不獨春鄭氏云春氣博

施故以廣大言之浩浩昊天求之博施尚書所云者論其義也則堯命義和欽若昊天無可怪耳亦見詩疏引

案爾雅釋天云春為蒼天夏為昊天秋為旻天冬為上天今文及許鄭春夏互易說文昷春為昷天元氣昷昷

旻虞書曰仁閔覆下則稱旻天蓋用古文說也昊天既為春天之名此舉春以統四時耳

**星辰** 史遷歷象作數法鄭康成以星辰為一

**疏**漢書李尋

傳尋引書曰歷象日月星辰此言仰觀天文俯察地理觀日月消息候星辰行伍李尋言俯察地理者蓋謂下

宅嵬夷宅南交等亦以義和卽羲仲等四子也史公說  
歷爲數者釋詁交象爲法者王逸注懷沙云象法也大  
戴五帝德篇云帝嚳歷日月而迎送之易繫辭云天垂  
象見吉凶聖人則之歷書云方士唐都分其天部而巴  
落下閎運算轉歷落下閎之法卽所謂歷如周馮相氏  
所掌今之推步學也唐都之法卽所謂象如周保章氏  
所掌今之占驗學也白虎通聖人篇云堯歷象日月璇  
璣玉衡是以星辰爲北極及斗建也鄭說見書疏周禮  
大宗伯職以實柴祀日月星辰注星謂五緯辰謂日月  
所會於十二次則辰當作曆此云星辰爲一是鄭謂中  
星也魯語展禽曰帝嚳能序三辰以固民注三辰日月  
星謂能次序三辰以治歷明時教民稼穡以安也亦以  
星辰爲一**敬授人時**注大傳說主春者張昏中可以種稷主  
夏者火昏中可以種黍主秋者虛昏中可以種麥主冬  
者昴昏中可以收斂皆云上告天子下賦臣人天子南

面而視四方星之中知人緩急故曰敬授人時

**疏**大傳見書

疏又民之緩急下云急則不賦籍不舉力役見太平御覽十一大傳說本尚書考靈耀史記正義引其文略同五行大義引曾子云亦同也所云據昏中星以授民時亦以義和即四子與馬鄭義異今文說也

**義仲**鄭康成曰官名蓋春為秩宗夏為司馬秋為士

冬為共工通稷與司徒是六官之名見也仲叔亦義和

之子堯既分陰陽為四時命義仲和仲義叔和叔等為

之官又主方岳之事是為四岳掌四時者曰仲叔則掌

天地者其曰伯乎 **疏**鄭注見周禮疏序及聖賢羣輔錄云稷與司徒者謂天地官也陰陽

即謂天地并四時為六官鄭以堯時有六官不獨據周制定之管子五行篇云黃帝得蚩尤而明於天道得大

常而察於地利得奢龍而辯於東方得祝融而辯於南方得大封而辯於西方得后土而辯於北方又云蚩尤為當時大常為摩者奢龍為土師祝融為司徒大封為司馬后土為李是黃帝時即有六官唐虞承其制也知主方岳之事為四岳者大傳云惟元祀巡狩四嶽八伯其下有羲伯和伯等樂與陽伯夏伯秋伯冬伯為六周禮敘引鄭注云堯始得羲和命為六卿其主春夏秋冬者并掌方嶽之事是為四嶽出則為伯後稍死鵬吸共工等代之乃分置八伯又注大傳儀伯云儀當為羲羲仲之後也羲伯羲叔之後也和伯和仲之後也不及和叔者脫文此鄭

宅嵎夷曰暘谷

**注**

史遷宅作居下同嵎

作郁暘作湯馬融曰嵎海隅也夷萊夷也暘谷海隅夷之地名居一作度嵎一作嵎

**疏**

宅嵎夷者王制云凡居民量地以制邑度地以

居民然則經言羲仲掌此東方居民之事也下宅義仿此書疏云使居治東方嵎夷之地又引王肅云皆居京

師而治之亦有時述職俱非也史公說宅為居者釋言  
文嶋為郁者聲之緩急賜谷為湯谷者史記索隱云史  
記舊本作湯谷今並依尚書字則後人改為賜谷也鄭  
注周禮縫人引宅西為度西知此宅今文皆作度也方  
言云度居也義俱相近嶋夷釋文云尚書考靈耀及史  
記作禺鏡書疏云夏侯等書為嶋鐵鐵亦鏡字嶋當為  
嶋說文云嶋夷在冀州陽谷立春日日值之而出賜說  
文作嶋云嶋山在遼西一日嶋夷賜谷也案史記夏本  
紀嶋夷既略索隱云按今文尚書及帝命驗並作禺鏡  
在遼西則今文以此禺夷之地在遼西後漢書東夷傳  
說夷有九種云昔堯命羲仲宅嶋夷日賜谷蓋日之所  
出也亦以為遼海之地嶋谷即首陽山谷今未平府是  
其地與馬說青州之嶋夷異也說文又有穀字云日出  
之赤依周禮注昧谷作柳穀之義亦當是今文賜谷異  
字馬注見釋文以嶋為海隅夷為萊夷者禹貢青州嶋  
夷既略萊夷作牧據此為說爾雅十藪齊有海隅萊夷

見馬疏**寅賓出日平秩東作****史遷寅賓作敬道平秩作**

便程下同馬融曰賓從也萃使也鄭康成曰謂春分朝

日作生平一作辨秩一作豳

**疏**

史公寅為敬者釋詁文

釋詁云償道也平秩為便程者聲俱相近說文戡从戡聲讀若詩戡戡大猷今作秩是也平秩謂使課其事薛

綜注西京賦云程謂課其技能也東作者趙岐注孟子

引此文云謂治農事也列子楊朱篇云宋有田父暨春

東作漢書集注應劭云東作耕也月令孟春之月王命

布農事命田舍東郊皆修封疆審端經術注云今尚書

分命羲仲宅嵎夷即謂此也馬注見釋文云賓從者釋

詁云賓服也服義近從云萃使者釋詁云擇使也萃聲

近擇鄭注見書疏云謂春分朝日者周語內史過曰古

者先王有朝日夕月以教民事君魯語公父文伯母曰

天子大采朝日與三公九卿祖識地德注云禮天子以

春分朝日示有尊也祖習也識知也地德所以廣生鄭

謂羲仲敬導天子朝日之事使民習知廣生之事云作

生者詩天作傳云作生也樂記云春作夏長秋斂冬藏

生者詩天作傳云作生也樂記云春作夏長秋斂冬藏

平作辨者鄭注周禮馮相氏云辨其序事引此經史記  
索隱云大傳平為辨疏云據書傳而言是今文俱作辨  
也釋言云便便辨也辨亦訓使洛誥云勿辨乃司民辨  
于酒伴來來示子漢人引作辨來來示子是也風俗通  
祀典篇引青史子云辨秩東作萬物觸地而出秩作豨  
者說文引經作豨云爵之次弟也月令天子迎春東郊  
還反賞公卿諸侯大夫於朝命相布德和令行慶施惠  
下及兆民疑即謂此事蓋依其爵秩次序而賞之也

日中注馬融曰日中宵中者日見之漏與不見者齊也

古制刻漏晝夜百刻晝長六十刻夜短四十刻晝短四

十刻夜長六十刻晝中五十刻夜亦五十刻鄭康成曰

日中宵中者日見之漏與不見者齊也疏日中者月令  
仲春之月日

夜分開元占經引張衡渾儀注云春分秋分日在黃赤  
二道之交中去極俱九十一度少強出卯入酉晝行地

上夜行地下俱一百八十二度半強馬注見詩東方未  
明疏及書疏以漏刻分晝夜者後漢律歷志云孔壺為  
漏浮箭為刻下漏數刻以考中星昏明生焉樂記云百  
度得數而有常注云百度百刻也言日月晝夜不失正  
也是漏刻本古制也鄭注見詩東方未明疏月令疏引  
鄭注尚書云日見之漏五十五刻不見之漏四十五刻  
與詩疏異者月令疏云馬揅日出日入為限蔡邕以為  
星見為夜日入後三刻日出前三刻皆屬晝晝有五  
六刻夜有十四刻與鄭注日見之漏與不見者  
齊不同者馬氏又多一刻屬晝是漢歷之不同也

**以殷仲春注** 史遷仲作中下同馬融鄭康成皆曰星鳥

星火謂正在南方春分之昏七星中仲夏之昏心星中  
秋分之昏虛星中冬至之昏昴星中皆舉正中之星不  
為一方盡見舉仲月以統一時鄭康成曰星鳥鶉火之



方殷中也春秋言温涼也

**疏**

經言星鳥者鳥謂朱雀南方之宿大傳云主春者張

昏中又云天子南面而視四星之中故說經者知是昏中于南方也張者天官書云張嚙即鳥之嚙也高誘注淮南主術訓云三月昏張其星中于南方張南方朱鳥之宿也月令季春之月昏七星中七星者天官書云七星頸即鳥之頸經云星鳥昏中為仲春月令為季春仲春昏弧中者月令疏云弧星近井如鄭康成之意南方七宿總為鳥星井星即鳥星之分故云星鳥與此同也按春分之昏斗指卯角亢在卯則井星柳星張正在南方也馬鄭注見書疏知正在南方者以大傳天子南面視四星知之以星鳥為七星者柳七星即鳥之體在七星之中故曰正中云舉仲月以統一時者周書周月解云凡四時成歲有春夏秋冬各有孟仲季以名十有二月此但舉仲月以統孟季三月為一時也古無歲差之說故鄭氏以月令舉其月初尚書總舉一月是中星不同鄭氏精于算術故可信也案月令仲春之月日在奎呂氏春秋古樂篇云黃帝鑄十二鐘以和五音以施英

韶以仲春之月乙卯之日日在奎始奏之此先秦人說  
黃帝時日躔與周時無差之證中星亦必同也鄭注見  
詩七月疏及釋文又見文選陸士衡樂府注云星鳥鶉  
火之方者南方三次鶉首鶉火鶉尾此言其中云殷中  
者釋詁文春秋言溫涼者春溫秋涼也按後人疑仲春  
之月星鳥未中創為歲差之說豈知經不言昏更不以  
昏幾刻為限既舉仲月鄭又以為總舉厥民析史遷  
一月則昏後數刻鳥星正中無可疑矣厥民析史遷  
厥為其下同疏析者高誘注呂覽仲春紀引經說也云

淳云析分也言使民分散耕鳥獸孳尾為  
種史公厥為其者釋言文鳥獸孳尾為

字微疏尾尾者列子黃帝篇云孳尾成羣張湛注云孳  
尾牝牡相生也殷敬順釋文云乳化曰孳交接

曰尾說文云孳汲汲生也是孳義為生史記集解引說  
文云尾交接也今說文但云微也史公為字微者說文  
云字乳也尾微申命義叔宅南交也  
也字孳聲相近申命義叔宅南交也  
大傳說堯南撫交

趾史遷宅作居鄭康成曰夏不言曰明都三字摩滅也

**疏**南交者書疏引書緯言春夏相與交秋冬相與互謂之母成子子助母疏又云春畫之日與立夏之初時

相交也東方之南南方之東位相交也四時皆舉仲月之候言其不統季孟於此言交明四時皆然大傳云中

祀大六爻注云中仲也古字通春為元夏為仲五月南巡狩仲祭大交氣於霍山也南交稱大交書曰宅南交

也大傳說堯南撫交趾者太戴禮少間篇云昔虞舜以天德嗣堯朔方幽都來服南撫交趾出入日月莫不率

俾墨子節用篇云昔者堯治天下南撫交趾北降幽都東西至日所出入莫不賓服似俱用此經文為說史記

索隱云東嶠夷西昧谷北幽都三方皆言地而夏獨不言或古文略舉一字名地南交則是交趾不疑也鄭注

見書疏以日明都三字為摩滅者朱詳其義 **平秩南訛** 史遷訛作譌平一

**作辨** **疏**史公平秩為平程見前文訛俗字當為譌周禮焉相氏注引作譌釋詁云訛動也說文云訛動

卷之二 二

也說蓋曉之誤漢書王莽傳云東巡勸東作南巡勸南  
 爲羣經音辨引書平秩南僞僞卽爲也淮南天文訓云  
 禾不爲藪麥不爲與稻昌相對成敬致疏致者江氏贊  
 文漢書天文志注孟康曰爲成也敬致疏以爲致日周  
 禮馮相氏冬夏致日春秋致月以辨四時之敘注云冬  
 至日在牽牛景長三尺夏至日在東井景尺五寸此長  
 短之極極則氣至冬無憊陽夏無伏陰春分日在婁秋  
 分日在角而月弦於牽牛東井亦以其景知氣至不春秋  
 冬夏氣皆至則是四時之敘正矣春秋左氏桓十七年  
 傳云日官居鄭以底日漢律歷志注蘇林曰底致也底  
 爲致者釋言文杜日永注馬融曰日長則晝漏六十刻  
 注云平也失之

夜漏四十刻鄭康成曰日長者日見之漏五十五刻於

四時最長也日不見之漏四十五刻也永者釋詁云長

篇云日所以有長短何陰陽更相用事也故夏節晝長  
 夏日宿在東井出寅入戌凡十二時日見有其八故極

長也月令仲夏之月日長至夏小正五月時有養日馬  
注見書疏云日長晝漏六十刻者日長出寅入戌鄭注  
考靈耀云五日增減一刻計春分至夏至九十二日當  
增十刻春分晝漏五十刻則夏至六十刻矣鄭注見書  
疏及周禮挈壺氏疏詩東方未明疏與馬異者挈壺氏  
疏云鄭與馬義異以其馬云春秋分晝夜五十刻據日  
見之漏若兼日未見日沒後五刻晝五十五刻夜四十  
五刻若夏至晝六十刻通日未見日沒後五刻則晝六  
十五刻夜三十五刻一年通閏有三百六十五日四分  
日之一四時之間九日有餘較一刻為率云是也高誘  
注呂覽云夏至之日晝漏水上刻六十五夜漏水上刻  
三十五各不同者日自長至漸長日增刻數各据一月  
上中下旬  
星火以正仲夏  
注史遷仲作中鄭康成曰星  
言之也

火大火之屬司馬之職治南岳之事得則夏氣和夏至

之氣昏火星中

**疏**月令仲夏昏亢中仲夏斗指午杓攜  
龍角角亢在午則氏房心尚在巳經

云星火與月令不同者月令疏引鄭荅孫顯云星火非謂心星也卯之十三度總為大火其曰大火之次有星者月令舉其月初尚書總舉一月故不同也按月令是月朔登明堂頒政之書故據朔日之昏言之尚書總舉一月通朔至晦而言仲夏之晦與季夏之朔僅差一日火星移已至午矣後世求其說不得疑為歲差不察鄭義蓋歲氣有差日躔盈縮使然天體無差二十八宿隨斗杓視而可識也鄭注見詩七月疏云星火大火之屬者夏小正五月初昏大火中傳曰大火者心也是星火即大火亦即鶉火也云司馬之職治南嶽之事者司馬夏官南嶽即霍山大傳云中祀大交霍山貢兩伯之樂焉有夏伯義伯之樂注云夏伯夏官司馬也弃掌之是南岳即霍山也云夏至之昏火星中者夏至火星未中月令疏引鄭志總舉一月則夏至在五月上旬加十五日小暑又十五日大暑

**厥民因**  
因者釋詁云儻因也說文云漢令解

角亢西移火亦正中矣

衣耕謂之襄蓋謂民相就而助成耕耨之事

**鳥獸希革**  
鄭康成曰夏時鳥

獸毛疏皮見

**疏**

希卽稀省文說文稀疏也希聲說文無希字希蓋萌字省文也漢書晁錯傳云

揚粵之地鳥獸希毛其性能醫鄭注見詩斯干疏以希爲疏用說文義革爲皮者說文革獸皮治去其毛革更

之分命和仲宅西注

史遷分作申西作西土鄭康成曰

西者隴西之西今人謂之兌山

**疏**

史公分命作申命者釋詁云申重也是以

和仲卽羲和之和承乃命云重命也西作西土集解引徐廣曰一無土字鄭注見史記集解徐廣云今天水之

西縣也漢書地理志隴西郡有西縣兌字郡國志引作八充傳寫之誤

曰昧谷注

史遷昧

或作柳夏侯等書同大傳谷作穀

**疏**

史公作柳者集解引徐廣云一作柳

谷書疏二引夏侯等書昧谷爲柳谷是言經之昧谷夏侯等爲柳谷也大傳谷作穀者虞傳云秋祀柳穀注云

入月西巡守祭柳穀之氣於華山也柳聚也齊人語鄭注周禮縫人云柳之言聚諸錦之所聚書經作柳穀賈

氏疏云柳者諸色所聚日將沒其色赤兼有餘色故曰柳穀按說文有穀字云日出之赤則穀當是假借字漢書郊祀志云東北神明之舍西方神明之墓也注張晏曰神明日也日出東北舍謂陽谷日沒於西故曰墓墓也

蒙谷 寅餞納日 **注** 史遷寅作敬納作入馬融曰餞滅也

滅猶沒也鄭康成曰謂秋分夕月 **疏** 史公寅為敬者釋羊傳云納者入辭也馬注見釋文餞為滅者書敘遂踐奄馬鄭俱訓為滅鄭注士虞禮云古文餞為踐是餞踐

通也滅為沒者高誘注淮南亦云鄭注周禮云沒入也鄭注見書疏云秋分夕月者魯語云少采夕月注云夕

日以秋分少采黼衣也昭謂朝 **平秩西成** **疏** 西成者白日以五采則夕月其三采也

篇云西方亦 **宵中** **注** 史遷宵作夜鄭康成曰夜中者日金成萬物也

不見之漏與見者齊 **疏** 史公以宵為夜者釋言文鄭注見周禮挈壺氏疏注意與日中



同馬義亦如此惜已缺略鄭注周禮星虛以殷仲秋

史遷殷作正仲作中鄭康成曰虛元武中虛宿也

殷作正者廣雅釋詁云殷正也鄭注見詩七月疏天官

書云北官元武虛故鄭以為元武中宿也月令疏云仲

秋之月昏牽牛中尙書云宵中星虛其仲冬之月云東

壁中尙書云日短星昴不同者亦是月令舉其初朔尙

書總舉一月之中理亦不異孔安國注尙書與此則別

按牽牛亦北宮七宿經文不限初昏宵分則虛亦移而

矣南厥民夷史遷作其民夷易疑衍夷字

文夷讀當如秦誓夷居之夷謚法鳥獸毛旡鄭康成

解云安心好靜曰夷時無農功也鳥獸毛旡鄭康成

曰旡理也毛更生整理

注同說文云旡仲秋鳥獸毛盛可選取以為器申命和

叔宅朔方曰幽都

**疏**

史遷朔作北

**疏**

史公以朔為北者釋詁云朔北方也

淮南地形訓云西北方曰不周之山曰幽都之門注幽

闔也都聚也元冥將始用事順陰而聚故曰幽都之門

幽都即幽州也下文流共

**疏**

工於幽州淮南作幽都 平在朔易

物平亦作辨

**疏**

經言在者釋詁云察也平者使也史公作便在伏物者大傳文見史記索隱索

隱引尸子云北方者伏方也太平御覽十一引大傳云

澤田獵以順天道以佐冬固藏也漢書

日短

**疏**

馬融曰

日短晝漏四十刻夜六十刻鄭康成曰日短者日見之

漏四十五刻於時最短

**疏**

馬注見史記集解及書疏白

也鄭注見周禮挈壺氏疏高誘注呂氏春秋日短極短

冬至之日晝漏水上刻四十五  
夜漏水上刻五十五同鄭說也  
星昴以正仲冬

仲作中鄭康成曰昴白虎中宿也  
疏 鄭注見詩七月疎  
云昴白虎中宿者

天官書西官咸池參為白  
虎昴與參連體說俱見前  
厥民隩鳥獸毳毛

其民燠馬融曰隩煖也毳温柔貌鄭康成作奧曰內也

毳一作璉又作襃毛一作髦  
疏 漢書鼂錯傳云胡貉之  
地鳥獸毳毛其性能寒

注師古曰毳細毛也案毳毛即義毛也史公隩作煖者  
老子釋文奧煖也隩奧通字煖義同煖馬注見釋文云

灑温柔貌者集解引徐廣灑音茸說文茸艸茸貌蓋  
謂艸生之柔細者與馬義近鄭注見文選赭白馬賦注

孔安國注論語云奧內也爾雅釋宮云西南隅謂之奧  
是為內也毳毛作璉髦者說文璉盛也虞書曰鳥獸璉

髦玉篇云璉眾也聚也毳同說文璉或作廢  
又引虞書曰鳥獸廢毛者孔壁古文異字  
帝曰咨汝

義暨和注史遷無此文朞三百有六旬有六日以閏月

定四時成歲注史遷作歲三百六十六日定作正鄭康

成日以閏月推四時使啟閉分至不失其常著之用成

歲歷將以授民時且記時事朞一作稭疏淮南天文訓

度七十六分度之二十六二十九日九百四十分日之  
四百九十九而為月而以十二月為歲歲有餘十日九  
百四十分日之八百二十七故十九歲而七閏白虎通  
日月篇云月有閏餘何周天三百六十五度四分度之  
一歲十二月日過十二度故三年一閏五年再閏明陰  
不足陽有餘也四時篇云歲者遂也三百六十六日一  
周天萬物畢成故為一歲也引此經文後漢律歷志引  
杜預長歷云書稱朞三百有六旬有六日云云是以天  
子必置日官諸侯必置日御世脩其業以考其術舉全  
數而言故曰六日其實五日四分之一日日行一度而

月行十三度十九分度之有時日官常會集此之遲疾以考成晦朔錯綜以設閏月閏月無中氣而斗指兩辰之間所以異於他月也積此以相通四時入節無違乃得成歲其微密至矣得其精微以合天道事序而不悖史公定作正者詩疏引孫炎注爾雅定正也鄭注見公羊隱元年傳疏云分至啟閉者分謂春分秋分至謂夏至冬至啟謂立春立夏閉謂立秋立冬是為入節推四時以置閏皆當其節不失其正則歲歷成所謂舉正於中也甚說文作稭云復其允釐百工庶績成熙史遷時也引此經蓋孔壁古文

允釐作信飭工作官庶績成熙作衆功皆興史公允

釋詁文釐為飭者鄭注易墜嗑云飭猶理也詩傳云釐理也是釐飭同義工為官者詩傳文庶衆績功成皆熙與並釋帝曰疇咨若時登庸史遷作堯曰誰可順此

事馬融曰羲和為卿官堯之末年皆以老死庶績多闕

故求賢順四時之職欲用以代羲和疇一作曷史公疇為

誰咨為此者俱釋詁文說文作曷云誰也若為順者釋言文時與事聲相近史公當以時為事也馬注見書疏

其說或本衛賈諸君子故鄭注大傳亦云堯始得羲和命為六卿後稍死鴉咬共工等代之也疇說文作曷云

詞也虞書曰曷咎據孔壁古文說與史公異按咨若時登庸言此順是升用時是登升釋詁文說文庸用也經

文言此事即謂羲和之職史記正義以放齊曰允子朱下言丹朱而云將登用之嗣位非也

**啟明** 史遷允作嗣朱作丹朱啟作開馬融曰允嗣也

**鄭康成**曰帝堯允嗣之子名曰丹朱開明也朱一作絳

**啟**一作開史公允為嗣者釋詁云允嗣繼也是允與嗣同義朱為丹朱者史記正義引荆州記

云丹水縣在丹川堯子朱之所封也啟為開者非避諱字若云啟明便不詞後人逢經文國字啟字便疑漢人

諱字輒加改正者誤也馬注見釋文鄭注見史記正義  
云名曰丹朱者以後文毋若丹朱傲謂并所封丹水而  
名之也朱說文作絲云虞書丹朱如此淮南秦族訓云  
雖有天下而絲勿能統也注云絲馬子也是古文作絲

帝曰吁嚚訟可乎注史遷作頑凶不用訟一作庸疏者

說文云驚也春秋左氏僖二十四年傳云口不道忠信  
之言為嚚訟者說文云爭也王逸注楚詞云謹諱為訟  
言其妄言而好爭可乎言不可也史公嚚作頑者左傳  
心不則德義之經為頑與嚚連文訟作凶者釋言云詢  
訟也說文詢或作訓或作說皆同字而云說也說蓋訟  
之譌凶即詢省或訟釋文引馬本作庸庸可言不可也

帝曰疇咨若予采注史遷說為誰可者馬融曰采官也

疏史公以疇為誰者釋詁文若順采 驩兜曰共工方鳩

倂功注史遷方作翊鳩作聚倂作布馬融曰倂具也鄭

康成曰共工水官名其人名氏未聞先祖居此官故以

官氏也堯末義和之子皆死庶績多闕當此之時驩兜

共工更相為舉鳩一作救又作速倭一作屨都者釋

也史公說方為翳者臯陶謨方施象刑白虎通聖人篇

以方為翳說文云翳溥也鳩為聚者釋詁文倭為布者

倭與撰聲相近王逸注楚詞云撰猶博也博義近布馬

注見釋文云倭具者孔安國注論語云撰具也倭與撰

聲相近用其義鄭注見史記集解及書說文禮疏序云

共工水官名者周語太子晉曰昔共工棄此道也虞于

湛樂淫失其身欲壅防百川墮高堙庠以害天下皇天

弗福庶民弗助禍亂並興共工用滅注賈侍中云共工

諸侯炎帝之後姜姓也顓頊氏衰共工氏侵陵諸侯與

高辛爭而王也或云共工堯時諸侯為高辛所滅昭謂

言為高辛所滅尙得為堯諸侯又堯時共工與此異也

按周語共工賈氏遠以為姜氏左傳說窮奇為少皞氏



之不才子少暉已姓又非一人故鄭亦云其人名氏未  
間以疑之鳩說文作迷云斂聚也虞書曰翬迷屏功又  
倂具也讀若汝南潯水虞書曰翬救倂功兼採  
各家異字意則同也倂漢書楊賜傳引作屏  
帝曰吁

靜言庸違象恭滔天注史遷靜作善庸作用違作僻象

作似滔作漫靜一作靖言一作譖違一作回恭一作龔

**疏**史公靜為善者藝文類聚八十七引韓詩曰靖善也  
靜與靖同庸為用者詩傳文選為僻者文選西征賦

注引薛君云回邪僻也周語注違邪也違與回同象為  
似者漢書集注亦云滔為漫者漫與慢同詩蕩云天降

滔德傳云天君滔慢也蓋謂其貌似恭敬而慢其天性  
天者高誘注淮南云性也謂慢天所付五常之性白虎

通壽命篇云又欲使民務仁立義無滔天滔天則司命  
舉過又文選西京賦云天命不詔注滔與滔音義同靜

作靖恭作龔者漢書王尊傳作靖言庸違象龔滔天注  
師古曰靖治也庸用也違僻也滔漫也潛夫論明暗篇

作靖言庸回言作譜者吳志陸抗傳抗日靖譜庸回唐書攸戒春秋左氏文十八年傳云靖譜庸回亦是共工也譜者一切經音義十七引三倉云謾也又王逸注天問康回憑怒云康回共工名也案康回疑庸回之誤以爲共工名

帝曰咨四岳

**注**

史遷咨作嗟鄭康成曰四岳

四時之官主四岳之事始羲和之時主四岳者謂之四伯至其死分岳事置八伯皆王官其八伯惟驩兜共工

放齊骸四人而已其餘四人無文可知

**疏**

四岳者漢書

云或說四岳爲四方諸侯此古文說與鄭異也史公咨爲嗟者說文云譴咨也鄭注見史記集解及周禮疏序云四時之官主四岳之事者堯時稱岳殷周則稱伯曲禮云五官之長曰伯是職方王制云二百一十國以爲州州有伯八州八伯各以其屬屬於天子之老二人分天下以爲左右二伯公羊隱五年傳云天子三公者何

天子之相也則何以三自陝而東者周公主之自陝而西者召公主之一相處乎內然則四岳之職堯時四人殷周則二人也周語太子晉以四岳佐禹為一王四伯則唐虞亦稱伯故鄭又云是為四岳謂之四伯也云至其死分岳事置入伯者大傳有陽伯儀伯夏伯羲伯秋伯和伯冬伯其一人缺文鄭注以陽伯為伯夷掌之夏伯棄掌之秋伯咎繇掌之冬伯垂掌之餘則羲仲和叔之後此云驩兜共工放齊骸四人其餘四人無文可知者鄭以大傳所言在舜卽真之年此在堯時當別自有人也周語云共之從孫四岳佐之又云胙四嶽國命為侯伯賜姓曰姜氏曰有呂鄭不據之為說以是佐禹治水者此時方薦用繇事在前也繇字作骸者玉篇繇公本切引世本顓頊生繇繇生高密是為禹也則世本作骸集韻又云繇或作骸亦作骸又云骸細骨蓋骸卽繇之誤繇亦

史公作湯湯洪水滔天浩浩懷山襄陵懷一作襄

**疏**  
水洪

者釋詁云洪大也說文云洪降水也降水不遵道方與  
 旁通說文云旁溥也割者大詁天降割於我家釋文云  
 割馬本作害廣雅釋言云害割也是方割為溥害也蕩  
 即豫假借字說文云濠水濠濬也讀若蕩懷亦作裏說  
 文云裏俠也漢地理志作裏裏者文選西京賦云裏岸  
 夷途薛綜注云裏謂高也陵者釋地云大阜曰陵浩者  
 說文云澆也虞書曰洪水浩浩滔滔者說文云水漫漫大  
 貌詩傳亦云大水貌呂氏春秋審為篇云昔上古龍門  
 未闕呂梁未發河出孟門大溢逆流無有  
 上陵沃衍平原高阜盡皆滅之名曰鴻水下民其咨有

能俾又

**注**

史遷咨作憂俾又作使治又一作雙

**疏**

史公咨為

憂者廣韻云嗷嗷憂聲也俾為使釋詁文又  
 為治者說文作雙云治也虞書曰有能俾雙

僉曰於鯨

**哉**

**注**

史遷僉作皆馬融曰鯨臣名禹父鄭康成曰於者

鳥聲

**疏**

史公僉為皆者釋詁文馬注見史記集解鄭注見詩文王疏云於者鳥聲者說文鳥孔子曰鳥

吁呼也取其助氣故以帝曰吁咈哉方命圮族注史遷為鳥呼古文鳥省作於

方作負圮作毀馬融曰方放也鄭康成曰方放謂放棄

教命疏咈者說文云違也史公方為負者方負聲之轉孟子梁惠王方命虐民注方猶逆也逆意近負

圮為毀者釋詁文馬注見釋文鄭注見書疏馬鄭俱以方為放者漢書傅喜傳傳太后詔曰放命圮族注應劭

曰放棄教令毀其族類又朱博傳曰今傳晏放命圮族皆用此經文是漢時俱讀方為放也圮族者春秋左氏

成四年傳云非我族類是族類同義漢書敘傳集注孟康引此經而說之云言蘇之惡壞其族類韋昭楚語注

云類善也岳曰異哉試可乃已注史遷作試不可用而

是言敗善疏異者說文云舉也引此文已者釋詁云輟已也史公可為不可者聲之緩急俗字增為叵即可字也

已疏帝曰往欽哉九載績用勿成注史遷載作歲績作功馬

帝曰往欽哉九載績用勿成注史遷載作歲績作功馬

融曰堯以大聖知時運當然人力所不能治下民其咨

亦當憂勞屈己之是從人之非遂用於疏云欽者釋詁云敬也史

公載為歲者釋天云載歲也夏曰歲商曰祀周曰年唐虞曰載史記正義引孫炎云歲取歲星行一次也載取

萬物始更終也書疏引孫炎作萬物終而復始說文云歲木星也越歷二十八宿宣福陰陽十二月一次馬注

見書疏云屈己從人者後漢書鄭興傳興上疏曰帝曰堯知絲不可用而用之者屈己之明因人之心也

咨四岳朕在位七十載汝能庸命異朕位注史遷咨作

嗟異作踐馬融曰朕我也異讓也鄭康成曰言汝諸侯

之中有能順事用天命者入處我位就治天子之事疏

史公異為踐者異踐聲相近詩崧高釋文引韓詩云踐任也鄭注曲禮云履也馬注見釋文云朕我者釋詁文

巽讓者論語子罕皇疏云巽恭遜也遜與讓義相近鄭注見史記集解以巽為人者易說卦文岳曰否

德忝帝位注史遷否作鄙疏忝者釋言云辱也史公否

衡問孔篇作鄙說為鄙陋則此言鄙德亦謂德鄙陋也曰明明揚側陋注史遷說

為悉舉貴戚及疏遠隱匿者揚一作敷側一作仄疏史

上明為悉者釋訓云明明察也說文云悉詳盡也詳盡之義近察下明為貴戚者周語尊貴明賢注云明顯也

孟子謂富貴為顯者故明亦為貴戚揚為舉者文王世子云或以事舉或以言揚是揚亦舉也側陋為疏遠隱匿者

高誘注淮南子云側伏也釋言云陋隱也是側陋為隱

作明明疏師錫帝曰注史遷作眾皆言於堯曰鄭康成曰

師諸侯之師疏史遷師為眾者釋詁文鄭注見書疏以師為諸侯之師者鄭注周禮云師長也

言諸侯有鰥在下曰虞舜注史遷鰥作矜說下為民間

馬融曰舜謚也舜死後賢臣錄之臣子為諱故變名言

謚鄭康成曰虞氏舜名疏史公鰥作矜者詩何草不黃云何人不矜王制云老而無

妻者謂之矜是矜鰥通字大傳云孔子對子張曰男子

三十而娶女子二十而嫁舜父頑母嚚不見室家之端

故謂之鰥大戴禮本命篇云中古男三十而娶女二十

而嫁太古男五十而室女三十而嫁故鄭注孝經云丈

夫六十無妻曰鰥又見後漢書光武帝紀注舜年三十

謂之鰥者唐虞之世已為中古也馬注見釋文云舜諡

者此下當如前注堯諡下有云仁聖盛明論曰舜今脫文

白虎通諡篇引禮記諡法曰仁聖盛明論曰舜史記集

解引諡法同今諡法脫其文云變名言諡者蓋以舜名

為重華也大戴禮五帝德幸我曰請問帝舜孔子曰曰

重華鄭注見書疏篇首以虞為氏者說文媯虞舜居媯

汭川以為姓蓋媯姓虞氏然無文証之舜為名者太平



御覽七十七引風俗通云自堯以上王者子孫據國而起功德浸盛故造謚舜禹本以白衣美祗行顯名升為天子雖復制謚不如名著故因名焉書疏云鄭注中候云重華舜名則舜不得有二名鄭注禮記云舜之言充是以舜為號謚之名則下注云舜名亦號謚名也江氏聲引戰國策周訢謂魏王曰宋人有學者三年反而名其母其母曰子學三年反而名我者何也其子曰帝曰吾所賢者無過堯舜堯舜名以此為証恐非莊論

**俞子聞如何****注**史遷俞作然子作朕史公俞為然者釋言文朕為子

者釋話云子朕我也**岳曰瞽子父頑母嚚象傲****注**史遷瞽作盲象

**作弟****疏**史公瞽為盲者說文云盲曰無牟子瞽目但有勝也是盲即瞽象作弟者趙岐注孟子云象舜

異母弟也頑者廣雅釋話云愚也又鈍也嚚者說文云倨也**克諧以**

**孝烝烝****注**史遷克作能諧作和**疏**克能釋言文諧和釋

說文云語聲也蓋多言也傲者說文云倨也

頑母器父號替叟弟曰象傲遊於嬖舜能諧柔之承事  
 替叟以孝用此文也丞丞者廣雅釋訓云孝也王氏引  
 之云謂之丞丞者言孝德之厚美也大雅文王有聲云  
 文王丞丞哉韓詩曰丞美也魯頌泮水云丞丞皇皇傳云  
 丞丞厚也陸賈新語道基篇曰虞舜丞丞於父母光耀  
 於天地蔡邕九疑山碑云逮于虞舜聖德克明克諧頑  
 傲以孝丞丞漢魏人多  
 以丞丞屬以孝為義  
 又**不格姦**史遷又作治格作  
 至**疏**又治格至皆釋詁文治謂舜能內治列女傳云舜  
 猶內治靡有姦意史公意當亦然也偽傳云使以  
 善自治是謂舜化其父母及弟孟子述象日以殺  
 舜為事又有捐階掩井等事知治為自治之安也  
**帝曰**  
**我其試哉****注**史遷帝曰作堯曰我作吾馬融鄭康成無  
 帝曰鄭曰試以為臣之事  
**疏**書疏云馬鄭說此經皆無  
 帝曰史公有堯曰吾其試  
 哉則有者孔安國古文也鄭注見書疏云試以為臣之  
 事指謂慎徽五典等事可見古本不分出舜典也論衡

正說篇云堯曰我其試哉說尚書曰試用也我其用之為天子也則鄭義本古說也偽傳云試舜行迹非

于時觀厥刑于二女注史遷作於是堯妻之二女觀其

德于二女鄭康成曰不言妻不告其父不序其正疏者女

杜預注左傳云以女妻人曰女時者釋詁云是也觀者論衡正說篇云觀者觀爾虞舜於天下不謂堯自觀之

也段氏玉裁云觀爾乃觀示之諷尔形近示又誤為爾也刑者詩思齊云刑於寡妻傳云法也鄭注見書疏知

不告其父者據孟子文釐降二女子于滄汭嬪于虞注史遷作舜飭

下二女於滄汭馬融曰水所出入曰汭疏釐為飭見上允釐百工疏

降下釋詁文二女長曰娥皇次曰女英見列女傳嬪者爾雅釋親云婦也後漢書荀爽傳爽對策曰降者下也

嬪者婦也言雖帝堯之女下嫁於虞猶屈體降下勤修婦道史公作舜飭下者言舜能化之也下云如婦禮堯

善之馬注見水經河水注水經注云河東郡南有歷山  
舜所耕處也有舜井媯汭二水出焉南曰媯水北曰汭  
水西逕歷山下尚書所謂釐降二女於媯汭也又駿風  
土記舜葬上虞之說又河水東過大陽縣南注云軫橋  
東北有虞原原上道東有虞城堯妻舜以嬪於虞者也  
按河東郡蒲阪縣今山西蒲州府虞今山西虞城縣書  
疏云世本堯是黃帝元孫舜是黃帝入代之孫計堯女  
於舜之曾祖爲四從姊妹以之爲妻於義不可或者世  
本之言未可據信或者古道質故也案禮大傳云四世  
而總服之窮也又云系之以姓而弗別綴之以食而弗  
殊百世而皆姻不通者周道然也太平御覽五百四十  
引外傳同夏殷五世之後則通昏姻然則周已前無同  
姓百世不通昏之制漢書元后傳云黃帝姓姚氏八世  
生虞舜舜起媯汭以媯爲姓則舜與堯姓已別矣爲昏  
何害孟子萬章篇云帝使其子九男二女以事舜於畝  
畝之中注云堯典曰釐降二女不見九男孟子時尚書  
凡百二十篇逸書有舜典之敘亡失其文孟子諸所言  
舜事皆堯典及逸書所載獨丹朱以允嗣之子距堯求

禪其餘八庶無事  
故不見於堯典

堯典第一上終

堯典第一下 虞夏書一 尙書今古文注疏卷一

賜進士及第授通奉大夫山東督糧道加三級孫星衍撰

帝曰欽哉慎徽五典五典克從注史遷徽作和克作能

馬融曰徽善也鄭康成曰五典五教也蓋試以司徒之

職疏慎者詩傳云誠也史公徽為和者徽與綏聲相近

馬注見釋文徽善釋詁文鄭注見史記集解云五

典五教者釋詁云典常也五常之教春秋左氏文十八

年傳云父義母慈兄友弟恭子孝又引此經云無違教

也云司徒之職見後經文納于百揆百揆時敘注史遷作徧入百官

百官時序疏史公納為入者鄭注周禮職納云職內主

入也廣雅釋詁云選入也則徧入為徧選

也揆者釋言云度也敘作序者釋詁云敘緒也序與敘

同按春秋左氏文十八年傳云使主后土以揆百事說

文云癸冬時水土可揆度也大傳云天子三公三日司空鄭既以慎徽五典為試以司徒之職此試以司空之職司空總領百事又兼冢宰也後漢百官志注引古史考曰舜居百揆總領百事說者以百揆堯初別置於周更名冢宰大戴禮盛德篇云官屬不理分職不明法政不一百事不紀曰亂也亂則飭冢宰時者釋詁云是也是敘者左傳又云無廢事也王氏引之云時敘猶承敘也承敘者承順也時詩聲相近鄭注特牲饋食禮云詩猶承也又注內則云詩之言承也康誥兩言時敘顧命明時朕言皆當訓承敘傳訓時為是不辭矣

于四門四門穆穆注史遷說為諸侯遠方賓客皆敬馬

融曰四門四方之門諸侯羣臣朝者舜賓迎之皆有美

德也鄭康成曰賓擯舜為上擯以迎諸侯疏史公以穆穆為敬者

釋訓文馬注見史記集解云四門四方之門者謂明堂宮垣四方之門也古者朝諸侯必于明堂太平御覽五

百三十二引明堂東應門南庫門西臯門北雉門周書  
明堂解及禮記明堂位皆云九夷之國東門之外八蠻  
之國南門之外六戎之國西門之外五狄之國北門之  
外是馬氏所謂四門也云有美德者釋詁云穆穆美也  
鄭注見書疏擯者鄭注儀禮云擯即儼字重文儀禮聘  
禮卿爲上擯大夫爲承擯士爲紹擯周禮大宗伯云朝  
覲會同則爲上相注云出接賓曰相準鄭上云試以司  
徒之事則此試以司馬之事也鄭注大傳云與宗伯同  
職者則謂之司馬公劉昭注百官志引明帝納于大麓  
詔曰謁者堯之尊官所以試舜下引此經也

**烈風雷雨弗迷****注**史遷說爲堯使舜入山林川澤暴風

雷雨舜行不迷馬融鄭康成曰麓山足也**疏**史公說大

川澤者穀梁億十四年傳云林屬于山爲麓以烈爲暴  
者詩傳云暴疾也淮南泰族訓云旣入大麓烈風雷雨  
而不迷注云堯使舜入林麓去遭大風雨不迷也論衡  
亂龍篇云舜以聖德入大麓之野虎狼不犯龍蛇不害



此俱孔氏安國古文說劉昭注百官志引新論曰昔堯  
 試於大麓者領錄天子事如今尚書官矣此夏侯歐陽  
 等今文說也大傳唐傳曰堯推尊舜而尚之屬諸侯焉  
 納之大麓之野烈風雷雨不迷致之以昭華之玉注云  
 山足曰麓麓者錄也古者天子命大事命諸侯則為壇  
 國之外堯聚諸侯命舜陟位居攝致天下之事使大錄  
 之漢書于定國傳上報定國曰萬方之事大錄于君論  
 衡正說篇云尚書曰四門穆穆入于大麓烈風雷雨不  
 迷言大麓三公之位也居一公之位大總錄二公之事  
 衆多並告若疾風大雨此以烈風雷雨為喻詞亦今文  
 說也風俗通義云堯禪舜納于大麓故漢魏諸儒多以  
 大麓為禪位之處魏公卿上尊號奏曰缺唐典之明憲  
 遵大麓之遺訓遂於繁昌築靈壇大赦天下改元  
 正始餘不勝載鄭注見釋文麓山足也詩傳文  
 帝曰  
 格汝舜詢事考言乃言底可績三載  
 女謀事至而言可績三年矣馬融曰底定也鄭康成曰

三年者賓四門之後二年也

**疏**史公云召舜者以格為

文言字疑衍文古文互似乃故重出乃言二字史記文

無之宋本北堂書鈔歎美部引請事考言乃底可積則

古本無乃言二字底為至者釋言云底致也周語注底

至也致即至也乃者鄭注周禮乃猶汝也積者釋言云

功也馬注見釋文云底定者釋言云底

定止也底義同定鄭注見史記集解 汝陟帝位舜讓

于德弗嗣 **注**史遷陟作登不嗣作不懌一作不怡 **疏**史

陟為登者釋言云陟登升也是陟義同登弗嗣作不懌

者史記自敘曰唐堯遜位虞舜不台班固典引云有于

德不台淵穆之讓皆作台集解引徐廣曰今文尚書作

不怡怡懌也釋言云怡懌樂也言德不足以悅服人也

經文作嗣者李善注文選典引云漢書音義韋昭曰古

文台為嗣魏公卿上尊號奏云光被四表讓德不嗣裴

松之引魏王上書云猶執謙讓于德不嗣

蓋今文作怡古文作嗣嗣者釋言云繼也 正月上日

**注**

馬融曰上日朔日也鄭康成曰帝王易代莫不改正堯

正建丑舜正建子此時未改堯正故云正月上日即位

乃改堯正故云月正元日故以異文

**疏**馬注見史記集解云上日朔日

者太平御覽十四引大傳云上日元日蓋鄭注大傳也  
鄭注禮記云朔初也唐以十二月為正當如殷以雞鳴  
為朔見大傳鄭注見書疏云帝王易代莫不改正者史  
記集解引作改正建朔白虎通三正篇云王者受命必  
改朔何明受之於天不受之于人是以禹舜雖繼太平  
猶宜改以應天知堯正建丑舜正建子者宋書禮志引  
詩推度災云軒轅高辛夏后氏漢皆以十二月為正少  
昊有唐有殷皆以十二月為正高陽有虞有周皆以十  
一月為正鄭說本此以正月上日與月正元日異文者  
此言正月猶是堯之正月下云月正明是改月之正且  
云元日者日之始  
以別於上日也

受終于文祖

**注**史遷說文祖者堯大

祖也又說受終云於是堯老命舜攝行天子之政馬融

曰文祖天也天為文萬物之祖故曰文祖鄭康成曰文

祖者五府之大名猶周之明堂疏史公說文祖為堯大

故受終于其廟王制疏引禮稽命徵云唐虞五廟親廟

四始祖廟一則黃帝為堯四世祖此太祖不知何人舜

祖黃帝則亦同太祖矣馬注見釋文以文祖為天者荀

子禮論云王者天太祖堯之祖黃帝亦必以配天馬說

與史公合也鄭注見史記集解云文祖五府之大名者

史記索隱引尚書帝命驗曰五府五帝之廟蒼曰靈府

赤曰文祖黃曰神斗白曰顯紀黑曰元矩唐虞謂之五

府夏謂世室殿謂重屋周謂明堂皆祀五帝之所也史

記正義云文祖者赤帝赤熒怒之府名曰文祖火精光

明文章之祖故謂之文祖周曰明堂案孝經云宗祀文

王於明堂以配上帝上帝即五府之帝唐時蓋以黃帝

配之明堂既為五府之總稱又為南向室之尊名也離

火文明故云文祖鄭說

與史公馬氏俱同義

在璿璣玉衡以齊七政

**禮**史遷

說北斗七星所謂旋璣玉衡以齊七政又說旋璣玉衡以齊七政卽天地二十八宿十母十二子大傳說璇者還也機者幾也微也其變幾微而所動者大謂之璇機是故璇機謂之北極七政謂春秋冬夏天文地理人道所以爲政也人道正而萬事順成又云七政布位日月時之主五星時之紀日月有薄食五星有錯聚七者得失在人君之政故謂之爲政馬融曰璿美玉也璣渾天儀可轉旋故曰璣衡其中橫筭所以視星宿也以璿爲

璣以玉爲衡蓋貴天象也七政者北斗七星各有所主  
第一曰主日法天第二曰主月法地第三曰命火謂  
榮惑也第四曰伐水謂辰星也第五曰煞土謂填星也  
第六曰危木謂歲星也第七曰罰金謂太白也日月五  
星各異故名七政也日月星皆以璿璣玉衡度知其盈  
縮進退失政所在聖人謙讓猶不自安視璿璣玉衡以  
驗齊日月五星行度知其政是與否重審已之事也鄭  
康成曰璿璣玉衡渾天儀也七政日月五星也動運爲  
機持正爲衡皆以玉爲之視其行度觀受禪是非也璿

璣一作璇機

**疏**

在者釋詁云察也史公說見天官書又見律書以北斗七星為旋璣玉衡者當

本孔安國說蕭吉五行大義引尚書說云璇璣斗魁四星玉衡拘橫三星合七齊四時五威五威者五行也五威在人為五命七星在人為七端北斗居天之中當昆侖之上運轉所指隨二十四氣正十二辰建十二月又州國分野年命莫不政之故為七政此同史公說也漢書律歷志云衡平也其在天也佐助旋機斟酌建指以齊七政此專以玉衡為北斗也劉昭注續漢天文志引星經云璇璣謂北極星也玉衡謂斗九星也別以玉衡專屬北斗而璇璣用大傳之說見下疏說苑辨物篇引此經說之云璇璣謂北辰勾陳樞星也以其魁杓之所指二十八宿為吉凶禍福天文列舍盈縮之占各以類為驗說苑亦以璇璣為北辰以其魁杓之所指上疑脫玉衡謂斗九星也一句此古文以北斗為玉衡之說也魏志魏王上書曰堯禪重華舉其克諧之德舜授文命采其齊聖之美猶下咨四岳上觀璇璣獨志先主傳議即陽泉侯劉豹等上言時時有景雲祥風從璇璣下來

又管寧傳王基薦寧曰上正璇璣協和皇極是漢魏人多不以璿璣為渾儀也以七政為即天地二十八宿者淮南天文訓星分度角十二亢九氐十五房心五尾十入箕十一四分一是為東方七宿斗二十六牽牛八須女十二虛十危十七營室十六東壁九是為北方七宿奎十六婁十二胃十四昴十一畢十六觜二參九是為西方七宿東井三十三與鬼四柳十五星七張翼各十八軫十七是為南方七宿淮南子又云凡二十八宿也二十八宿在天史公云天地者兼分野言之亦見天文訓云十母十二子者母為干子為支天文訓云斗指子則冬至加十五日指癸則小寒加十五日指丑則大寒加十五日指報德之維故曰距冬至四十六日而立春加十五日指寅則雨水加十五日指卯則雷驚蟄加十五日指卯中繩故曰春分加十五日指乙則清明風至加十五日指辰則穀雨加十五日指常羊之維故曰有四月十六日而立夏加十五日指巳則小滿加十五日指丙則芒種加十五日指午故曰有四月十六日而夏至加十五日指丁則小暑加十五日指未則大暑加十五日



任指背陽之維故曰有四十六日而立秋加十五日指  
 申則處暑加十五日指庚則白露降加十五日指酉中  
 繩故曰秋分加十五日指辛則寒露加十五日指戌則  
 霜降加十五日指號通之維故曰有四十六日而立冬  
 加十五日指亥則小雪加十五日指壬則大雪加十五  
 日指子此以十母十二子配二十四氣也大傳云璇機  
 謂之北極者天官書云中宮天極星釋天云北極謂之  
 北辰公羊疏引孫炎云北極天之中以正四時謂之北  
 辰史記索隱引春秋合誠圖云北辰其星五在紫微中  
 案其說則是太一及後句四星是也此蓋夏侯歐陽之  
 說故與史公又殊也以七政為四時天地人者名之為  
 政故以人道言之又云七政布位以為日月五星者引  
 見玉海天文書此或歐陽之說又與夏侯不同五行大  
 義引尚書考靈耀七政篇曰日月者時之主也五星者  
 時之紀也下引經文與大傳說同馬注見書疏及史記  
 索隱以璿為美玉璣為渾天儀衡為橫筭者筭書疏引  
 作簫說本書緯初學記引尚書考靈耀云觀玉儀之旋  
 昏明主時鄭注云以玉為渾儀故曰玉儀晉書天文志

引春秋文耀鉤云唐堯卽位羲和立渾儀隋書天文志引晉劉智云或問曰顓頊造渾儀黃帝爲蓋天此皆同馬鄭說也璿爲美玉者說文云璿赤玉也衡爲橫簫者史記正義引蔡邕云玉衡長八尺孔徑一寸下端望之以視星宿並懸璣以象天而以衡望之轉璣窺衡以知星宿璣徑八尺圓周二尺五寸而強也云北斗七星各有所主者開元占經六十七引詩含神霧云七政者斗上一星天位二主地三主火四主水五主土六主木七主金又引石氏曰北斗第一星主日第二星主月第三星主熒惑第四星主辰星第五星主填星第六星主歲星第七星主太白馬氏所本也鄭注見史記集解及宋書天文志以璿璣玉衡爲渾天儀亦本緯書璿璣或作璇機者大傳文云視其行度觀受禪是非者漢書司馬相如傳封禪書云舜在假典顧省厥遺注師古曰在察也假天也典則也言舜察璇璣玉衡恐已肆類于上帝政化有所遺失不合天心是鄭所本也

**注** 史遷肆作遂今尙書夏侯歐陽說類祭天名也以事

類祭之奈何天位在南方就南郊祭之是也古尚書說  
非時祭天謂之類言以事類告也肆類于上帝時舜告  
攝非常祭馬融曰上帝太乙神在紫微宮天之最尊者

鄭康成曰禮祭上帝於圓丘肆一作彘類一作禴疏史

肆作遂者周禮鐘師職杜子春引呂叔玉國語注云肆  
遂也釋詁云肆故也鄭注儀禮云遂因也其義亦相近  
今尚書歐陽說見太平御覽五百二十七引五經異義  
古尚書說見御覽五百二十五王制疏引許氏謹案周  
禮郊天無言類者知類非常祭從古尚書說鄭氏無駁  
案非時祭天謂之類者有二攝位其一也王制云天子  
將出征類乎上帝詩文王云是類是禱釋夫云師祭也  
其二也馬注見釋文以上帝為太乙神者知天宮書所  
云中宮天極星其一明者太一常居也鄭注見史記集  
解云禮祭上帝於圓丘者鄭注禮經所言周祀天之禮

夏正祀五帝于南郊冬至祀天于圜丘此言圜丘者所祭卽天皇大帝北極耀魄寶與馬義台也遂作歸者說文引此經文類作禴者說文云禋于六宗注今歐陽夏禴以事類祭天也俱孔壁古文

侯說六宗者上不及天下不及地傍不及四時居中央恍惚無有神助陰陽變化有益於人故郊祭之古尙書說六宗天地神之尊者謂天宗三地宗三天宗日月星辰地宗岱山河海日月爲陰陽宗北辰爲星宗岱爲山宗河爲水宗海爲澤宗祀天則天文從祀地則地理從馬融曰禋精意以享也六宗天地四時也萬物非天不覆非地不載非春不生非夏不長非秋不收非冬不藏

此其謂六宗也鄭康成曰禋煙也取其氣達升報于陽也六宗禋與祭天同名則六者皆天神謂星辰司中司命風伯雨師也星謂五緯也辰謂日月所會十二次也司中司命文昌第五第四星也風師箕也雨師畢也禋一作煙疏禋者說文云絜祀也一曰精意以享為禋今尚書歐陽夏侯說見周禮大宗伯疏引異義云上不及天下不及地云云者禮記祭法疏引作上及天下及地旁及四方中央漢書郊祀志引歐陽大小夏侯三家說六宗皆曰上不及天下不及墜旁不及四方在六者之間助陰陽變化實一而名六此蓋伏生所傳最古之說也古尚書說亦見大宗伯疏方言天宗而及地宗故鄭駁之此蓋衛賈孔壁古文之說故劉昭注後漢志引賈逵曰六宗謂日宗月宗星宗岱宗河宗海宗也儀禮通解續因事之祭引大傳鄭注云馬氏以為六

宗謂日月星辰泰山河海也與釋文引馬注天地四時不同疑釋文及書疏以大傳爲馬注月令孟冬之月天子祈來年于天宗注云凡屬天子之神日月星辰皆爲天宗也案此注疑許氏慎說與高誘注呂氏春秋不同馬注見釋文及書疏大傳云萬物非天不生非地不載非春不動非夏不長非秋不收非冬不藏故書曰煙于六宗此之謂也呂氏春秋十月紀天子乃祈來年于天宗高誘注云宗尊也凡天地四時皆爲天宗萬物非天不生非地不載非春不動非夏不長非秋不收非冬不藏書曰煙于六宗此之謂也亦同大傳鄭注見書疏周禮大宗伯疏引異義謹案夏侯歐陽說云宗實一而有六名實不相應春秋魯郊祭三望言郊日月星辰河海山凡六宗魯下天子不祭日月星辰故祭分野星其中山川故言三望六宗與古尚書同元之聞也書曰肆類于上帝禋于六宗望于山川徧于羣神此四物之類也禋也望也徧也所祭之神各異六宗言禋山川言望則六宗無山川明矣周禮大宗伯曰以禋祀祀昊天上帝以實柴祀日月星辰以槱燎祀司中司命風師雨師凡此

所祭皆天神也禮記郊特牲曰郊之祭也迎長日之至也大報天而主日也兆於南郊就陽位也埽地而祭於其質也祭義曰郊之祭大報天而主日配以月則郊祭并祭日月可知其餘星也辰也司中司命風師雨師此之謂六宗亦自明矣此則許氏從古尙書說鄭氏駁之禮大傳作煙今文尙書字鄭注云煙祭也字當爲禋魏公卿上尊號奏曰煙于六宗案六宗史公無說不知孔安國說與今文說同否今文說最古而近理月令祈年于天宗當祈其助陰陽變化有益於人者六宗爲上下四方之宗亦不得如許氏所駁宗一而有六名實不相應鄭氏據周禮定之未知唐虞之制同否要勝于古尙書說漢書郊祀志注孟康曰六宗星辰風伯雨師司中司命一說云乾坤六子又一說天宗三日月星辰地宗三泰山河海或曰天地間游神也其劉歆等以易震巽六子之卦爲六宗王肅依偽家語祭時望于山川徧于寒暑日月星水旱偽傳從之自鄧無取

羣神  
史遷徧作辯鄭康成曰徧以尊卑次秩祭之羣

神若丘陵墳衍之屬

**疏**

望于山川江氏聲云穀梁僖卅一年范甯注引鄭氏曰望者祭

山川之名未知是尙書注否公羊僖卅一年傳曰三望

者何望祭也然則葛祭祭泰山河海史記正義云山川

五嶽四瀆也史公徧爲辯者儀禮及禮記徧多作辯鄭

注鄉飲酒禮及燕禮云今文辯皆作徧是辯爲古字集

解引徐廣云辯音班者揚雄太常箴及後漢祭祀志引

光武封泰山刻石皆作班于羣神漢樊毅修華岳廟碑

作辯是班爲今文也鄭注見詩時邁疏及般正義云上

陵墳衍者周禮大司樂云凡六樂者一變而致川澤之

示再變而致山林之示三變而致丘陵之示四變而致

墳衍之示上言山川則此羣神當爲丘陵墳衍鄭亦據

周禮推輯五瑞既月乃日觀四岳羣牧班瑞于羣后

之也史遷輯作揖說既月乃日爲擇吉月日大傳說故圭冒

者天子所以與諸侯爲瑞也諸侯執所受圭以朝天子



瑞也者屬也無過行者復其圭以歸其國有過行者留

其圭能改過者復其圭三年圭不復少紉以爵六年圭

不復少紉以地九年圭不復而地畢馬融曰揖斂也五

瑞公侯伯子男所執以為瑞信也堯將禪舜使羣牧斂

之使舜親往班之疏史公輯為揖者漢書郊祀志亦作

既日月乃日為擇吉月日者曲禮云先聖王所以使民信

時日注云日所卜筮之吉日也覲者釋詁云見也大傳

見太平御覽五及禮書五十二云圭冒者大傳又云天

子執冒以朝諸侯見則覆之說文云瑁諸侯執圭朝天

子天子執玉以冒之似犁冠古文作瑁經文不言瑁大

傳補其義馬注見史記集解云揖斂也者鄭注禮月

輯斂也云五瑞者周禮典瑞云公執相圭九寸侯執信

圭七寸伯執躬圭五寸子執穀璧男執蒲璧皆五寸云

班之者釋言云班賦也書疏引孫炎曰謂布與也  
馬氏以堯使羣牧斂瑞偽傳以爲舜斂者誤也 歲二

月東巡守至于岱宗柴望秩于山川肆觀東后注史遷

肆作遂觀作見后作君長馬融曰舜受終後五年之二

月柴祭時積柴加牲其上而燔之鄭康成曰歲二月者

正歲建卯之月也巡守者行視所守也岱宗者東嶽名

也柴者考績燎也望秩于山川者徧以尊卑祭之五嶽

視三公四瀆視諸侯其餘小者或視卿大夫或視伯子

男矣秩次也東后東方之諸侯也柴一作紫或作禘疏

史公肆爲遂者見上疏觀爲見后爲君釋詁文馬注見  
史記集解及釋文知爲受終後五年者據下經文五載

一巡守而言云柴祭時積柴加牲其上燔之者周禮大  
 宗伯禋祀實柴燎燎注云禋積也三祀皆積柴實牲體  
 焉或有玉帛燔燎而升煙所以報陽也鄭司農云實柴  
 實牛柴上也鄭注見公羊隱八年傳疏云歲二月為正  
 歲建卯之月者堯正建丑則建卯是三月經于二月上  
 特加歲文明其為正歲之二月故云建卯之月白虎通  
 巡守篇云以夏之仲月者同律度當得其中也二月八  
 月晝夜分五月十一月陰陽終劉昭注祭祀志引范甯  
 曰二月建卯故以東巡守也案建卯謂斗柄昏指正東  
 方云巡守者行視所守者公羊隱八年傳注云王者所  
 以必巡守者天下雖平自不親見猶恐遠方獨有不得  
 其所故三年一使三公緇陟五年親自巡守巡守猶循也  
 守猶守也循行守視之辭亦不可國至人見為煩擾故  
 至四嶽足以知四方之政而已云岱宗東嶽名者爾雅  
 釋山云河東岱又云泰山為東嶽白虎通巡狩篇云嶽  
 之為言掬也掬功德也東方為岱宗何言萬物更相代  
 於東方也云考績燎者禮器注引孝經說曰封乎泰山  
 考績燔燎禋乎梁甫刻石紀號後漢書張純傳純奏曰

歲二月東巡狩至於岱宗柴則封禪之義也云五嶽視三公云云者王制云天子祭天下名山大川五嶽視三公四瀆視諸侯大傳文畧同云秩次者說文有駢云爵之次弟也柴說文作禘云燒柴焚燎以祭天神引此經作柴云古文作禘則協時月正日同律度量衡史遷孔壁古文有作禘者

協作合馬融曰律法也鄭康成曰協正四時之月數及日名備有失誤其節氣晦朔恐諸侯有不同故因巡狩而合正之同陰律呂陽律也度量斗斛衡斤兩也

稱上曰衡協一作叶史公協為合者經文協和萬邦

法應邵云叶合也說文云叶叶即協古字馬注見釋文云律法也釋詁文鄭注見史記集解及通典吉禮巡守又見釋文史記集解文選六代論注云月數謂閏月正四時日名謂甲乙之類也云備有失誤者失閏則四時

乖誤云同陰律呂陽律者史記集解引作同音律蓋有  
脫字此據釋文周禮太師掌六律六同以合陰陽之聲  
陽聲黃鐘大蕤姑洗蕤賓夷則無射陰聲大呂應鐘南  
呂函鐘小呂夾鐘又典同掌六律六同之和以辨天地  
四方之律以銅爲管竹陽也銅陰也各順其性注云律  
述氣者也同助陽宣氣與之同皆以銅爲之是律爲陽  
同爲陰也漢書律歷志云律十有二陽六爲律陰六爲  
呂是六同又名六呂故云同陰律呂陽律云度丈尺者  
律歷志云度者分寸丈尺引也所以度長短也本起黃  
鐘之長以子穀秬黍中者一黍之廣度之九十分黃鐘  
之長一爲一分十分爲寸十寸爲尺十尺爲丈十丈爲  
引而五度審矣云量斗斛者律歷志云量者龠合升斗  
斛也所以量多少也本起於黃鐘之龠用度數審其容  
以子穀秬黍中者千有二百實其龠以井水測其槩十  
龠爲合十合爲升十升爲斗十斗爲斛而五量審矣云  
衡斤兩者律歷志云衡權者權重也衡所以任權而均  
物平輕重也本起於黃鐘之重一龠容千二百黍重十  
二銖兩之爲兩二十四銖爲兩十六兩爲斤三十斤爲

鈞四鈞爲石村爲十八易十有八變之象也漢志前又云虞書曰乃同律度量衡所以齊遠近立民信也勅白虎通巡狩篇及漢永和二年詔引經皆作叶

**修五禮五玉**

**注**大傳五玉作五

樂說爲樂正定樂名并論八音四會又說箎以爲八此八伯之事也分定於五此五嶽之事也三帛二生一死

**贅如五器**

**注**史遷贅作爲擊二字馬融曰五禮吉凶軍

賓嘉也三帛三孤所執也華二生羔雁卿大夫所執一

死雉士所執五器上五玉鄭康成曰五禮公侯子男朝

聘之禮矣五玉瑞節執之曰瑞陳列曰玉也三帛所以

薦玉也受瑞玉者以帛薦之帛必三者高陽氏之後用

赤繪高辛氏之後用黑繪其餘諸侯皆用白繪周禮改  
之爲纁也二生一死贄者羔雁生也卿大夫所執雉死  
士所執也如者以物相授與之言授贄之器有五卿大  
夫上士中士下士也器各異飾飾未聞所用也周禮改  
之飾羔雁飾雉執之而已皆去器贄之言至所以自致

也贄一作藝

**說文**

史公贄作爲摯者贄俗字後人所改當  
爲摯大傳五玉作五樂見虞夏傳云樂

正定樂名云元祀代泰山貢兩伯之樂焉陽伯之樂舞  
侏離其歌聲比余謠名曰哲陽儀伯之樂其歌聲比大  
謠名曰南陽中祀大交霍山貢兩伯之樂焉夏伯之樂  
舞謚或其歌聲比中謠名曰初慮羲伯之樂舞將陽其  
歌聲比大謠名曰朱于秋祀柳穀華山貢兩伯之樂焉  
秋伯之樂舞蔡俶其歌聲比小謠名曰苓落和伯之樂

舞元鶴其歌聲比甲謠名曰歸來幽都安山祝貢兩伯  
之樂焉冬伯之樂舞齊陽日綬綬并論八音四會鄭注  
云此上下有脫辭其說未聞大傳又說見虞夏傳云樂  
者人性之所自有也故聖王巡十有二州觀其風俗習  
其性情因論十有二俗定以六律五聲八音七始管其  
素簇以爲八此八音天化也七始天統也漢書郊祀志五  
五聲天音也八音天化也七始天統也漢書郊祀志五  
王亦作五樂是今文有五樂在五禮之下或卽五王之  
異文二生者古以麋鹿一死者雉也白虎通文質篇云  
臣見君所以有贊何贊者贊也贊已之誠致已之捆福  
也公侯以玉爲贊者玉取其燥不輕濕不重公之德全  
卿以羔者取其羣不黨大夫以鴈爲贊者取其飛成行  
列士以雉爲贊者取其不可誘之以食備之以威必死  
不可生畜又云卿大夫贊古以麋鹿今以羔鴈何以爲  
古者贊取其內謂得美草鳴相呼今文取其外謂羔鴈  
乳膺有行列也禮相見經曰上大夫相見以羔左顧右  
贊執麋明古以麋鹿今以羔也據此知唐虞時二生是  
麋鹿非羔鴈也云左顧右贊執麋今犧禮作左頭如鹿



馬注見史記集解以五禮為吉凶軍實嘉者據周禮大宗伯以說之也云三帛三孤所執者漢書百官公卿表云周官則備矣太師太傅太保是為三公又立三少為之副少師少傅少保是為孤卿考工記外有九室九卿朝焉注云六卿三孤為九卿周禮典命云公之孤四命以皮帛眡小國之君然則天子之孤卿亦執帛也漢書王莽傳云夏后塗山之會執玉帛者萬國諸侯執玉附庸執帛故云眡小國之君也云摯二生羔雁卿大夫所執一死雉士所執者周禮大宗伯職以禽作六摯卿執羔大夫執雁士執雉注云羔取其羣而不失其類雁取其候時而行雉取其守令而死不失其節是也鄭注見公羊隱八年傳疏及史記正義以五禮為公侯伯子男朝聘之禮者因唐虞時未有五禮蓋五等諸侯名位不同禮亦異數云執之曰瑞陳列曰玉者以五玉即五瑞也云三帛所以薦玉并言高陽氏之後用亦繪云云曲禮疏引禮合文嘉云天子三公諸侯皆以三帛以薦玉宋均注云其殷三帛謂朱白蒼象三正其五帝之薦薦玉用一色之帛通典五十五引何齊中侯云高

尙赤薦玉以赤繒高辛氏尙黑薦玉以黑繒陶唐氏尙  
白薦玉以白繒堯建丑其餘諸侯奉堯正朔故皆用白  
繒矣云周禮改爲纁者典瑞云王晉大圭執纁圭纁藉  
五采五就公執桓圭侯執信圭伯執躬圭纁皆三采三  
就子執穀璧男執蒲璧纁皆二采再就注云纁有五采  
文所以薦玉木爲中幹用韋衣而畫之三采朱白蒼二  
采朱綠也就成也一匝爲一就是周禮改帛用纁也云  
如者以物相授與之言者釋詁云如往也云授摯之器  
有五者二生一死禽止三種而器有五蓋上中下士有  
三等器各異飾并羔雁之器爲五也云周禮改之飾羔  
雁飾雉執之去器者儀禮士相見禮云摯冬用雉夏用  
鶡左頭奉之下大夫相見以雁飾之以布維之以索如  
執雉上大夫相見以羔飾之以布四維之結于面左頭  
如麇執之是不用器也丁度集韻如乃個切若也書曰  
如五器卒乃復鄭康成讀江氏聲以如鄭讀爲笈段氏  
玉裁以下有五器如不可訓笈云贊之言至所以自致  
者見白虎通文質篇鄭以三帛爲薦玉之帛五器爲授  
物之器馬則無玉者執帛五器卽五玉以此不同生封

禪書作牲贊亦从女說文云藝至也一曰虞書雉藝蓋孔壁古文 卒乃復 **禮** 馬融曰五

器上五玉五玉禮終則還之二帛已下不還也鄭康成

曰卒已也復歸也巡守禮畢乃反歸矣每歸用特牛告

于文祖矣 **疏** 馬注見史記集解云三帛已下不還者謂

復為還玉也釋詁云卒終也鄭注見公羊隱八年傳疏

云卒已者釋詁文復者釋言云返也返即歸也鄭以卒

乃復為巡 五月南巡守至于南岳如岱禮 **疏** 史遷說南

守還歸也 嶽衡山也大傳說五嶽謂岱山霍山華山恒山嵩山也

**疏** 史公說見封禪書漢書郊祀志用之或孔安國說地

理志長沙國湘南縣衡山在東南今在湖南衡州府

西大傳說見白虎通巡狩篇云南方為霍山何霍之為

言護也言太陽用事護養萬物也水經禹貢山水澤地

所在云霍山爲南嶽在廬江瀟縣西南案瀟今安徽潛山縣論衡書虛篇云舜巡狩東至岱宗南至霍山西至太華北至恒山以爲四嶽者四方之中諸侯之來並會嶽下幽深遠近無不見者聖人舉事求其宜適也此以霍山爲南嶽皆今文說爾雅釋山說五嶽云江南衡用孔安國古文說也又云霍山爲南嶽用今文說也郭璞注云漢武帝以衡山遼曠因讖緯皆以霍山爲南嶽故移其神於此案緯書皆本今文漢武案古圖書復南嶽之舊非以霍山爲南嶽始自漢武也通典引三禮義宗云唐虞以衡山爲南岳周氏以霍山爲南嶽蓋傳寫互誤非崔靈恩之失也周禮以衡山爲南嶽唐虞五嶽卽是霍山也竊疑經文言五月南巡守至于南岳則舜都平陽吉行五十里計一月可至霍山若至衡山遼遠且又踰江不便以觀南方諸侯故歐陽夏侯等說爲霍山蓋本之伏生是以大傳又有中祀霍山及莫南方霍山之文也但安徽霍邱縣自有霍山而水經所說以瀟山縣天柱山當八月西巡守至于西岳如初

史遷說爲

西嶽華山也

**疏**

此又五年之八月也下放此史公說見

華山為西嶽今在陝西華陰縣南白虎通巡狩篇云華之言獲也言萬物成熟可得獲也十有一月

朔巡守至于北岳如西禮

**注**

如西禮史遷作皆如初上

文至于西岳下無初字馬融鄭康成皆作如初鄭康成

曰五月不言初者以其文相近八月十一月言初者文

相遠故也

**疏**

史公如西禮作皆如初者兼上至于西岳言之無上如初二字馬作如初者見釋文

至于北岳如西禮下注云姚方興本同馬本作如初鄭注見公羊隱八年傳疏云八月十一月皆言初則鄭與

馬本同朔者釋訓云北方也釋山云河北恒又云恒山為北嶽今在直隸曲陽縣西北白虎通巡狩篇云北方

為恒山者何恒者常也萬物伏藏於北方有常也

歸格于藝祖

**注**

藝祖一作祖

禴用特牛史遷格作至藝祖作祖禴廟特作用特牛禮

馬融曰藝禴也鄭康成曰藝祖文祖猶周之明堂每歸

用特者明祭一岳即歸也如尙書王制之文所以不一

岳之後而云歸者因明四岳禮同使其文相次是以終

巡守之後乃始云歸耳

**疏**史公格作至者釋詁文藝祖為祖禴廟者白虎通巡守篇

云王者出必告廟何孝子出辭反面事死如事生尙書曰歸假于祖禴又三軍篇云獨見禴何辭從卑不敢留尊之命至禴不嫌不至祖也尙書曰歸假于藝祖通典引云獨言禴者辭特先從禴後至祖案經文藝在祖先藝即禴也藝與禴聲相近故史公與班氏同義也白虎通巡守篇作祖禴疑今古文之異以特為特牛者鄭注王制云特特牛也馬注見釋文云藝禴者古無禴字說文繫傳云禴秋收也玉篇祿與禴同秋田祭也則知禴

卽獮俗字蓋借爲昵也鄭注見詩我將疏及通典巡守  
云藝祖文祖者藝文同義云猶周之明堂者孝經云宗  
祀文王于明堂以配上帝太平御覽五百三十三引周  
書明堂云明堂方百一十二尺高四尺階廣六尺三寸  
室居中方百尺室中方六十尺戶高八尺廣四尺東應  
門南庫門西皋門北雉門東方曰青陽南方曰明堂西  
方曰總章北方曰元堂中央曰太廟左爲左介右爲右  
介藝文類聚三十八引云闕高三尺門方十六尺初學  
記十三引中央曰太廟亦曰太室白虎通辟雍篇云明  
堂上圓下方八窗四達布政之宮在國之陽上圓法天  
下方法地入窗象八風四闕法四時九室法九州十二  
坐法十二月三十六戶法三十六兩七十二闕法七十  
二風應邵注漢書帝紀云有虞曰總章是有虞明堂與  
周同制但異其名也云明祭一嶽卽歸者五帝巡守一  
嶽卽歸又五年再巡一嶽也云尙書王制之文不一岳  
之後而言歸者王制亦有五月南巡守至十有一月北  
巡守之文亦以歸格于祖禴之文在  
後故云終巡守之後乃始云歸也

五載一巡守羣后

四朝注史遷載作歲馬融曰四面朝于方岳之下鄭康

成曰四朝四年朝京師也巡守之年諸侯見于方岳之

下其間四年四方諸侯分來朝于京師歲徧是也疏公史

載為歲者經文本或作歲後人泥唐虞曰載之說改之

白虎巡狩篇云所以不歲巡狩何為太煩也過五年為

太疏也三歲一閏天道小備五歲再閏天道大備故五

年一巡狩馬注見釋文以四面朝于方岳之下者言諸

侯因天子巡守四面來見于方岳之下不復來朝京師

也鄭注見釋文史記集解及王制疏云四年朝京師者

詩韓奕疏引說周禮賈逵以為一方四分之或朝春或

觀秋或宗夏或遇冬藩屏之臣不可虛方俱行故分趨

四時助祭也王制諸侯禘則不禘禘則不嘗嘗則不烝

烝則不禘注云虞夏之制諸侯歲朝廢一時祭公羊桓

元年傳注云王者與諸侯別治勢不得自專朝故即位

比年使大夫小聘三年使上卿大聘四年又使大夫小



聘五年一朝王者亦貴得天下之歡心以事其先王因  
 助祭以述其職故分四方諸侯為五部部有四輩輩主  
 一時引此經文疏又引虞傳云古者諸侯之於天子五  
 年一朝魯語曹翹曰先王制諸侯五年四王一相朝也  
 注唐尚書云先王謂堯也五載一巡守諸侯四朝此與  
 鄭義同也鄭以上經文有肆觀之事故云巡守之年諸  
 侯見于方岳之下云其間四年四方諸侯分來朝于京  
 師歲徧者謂四方諸侯分為四部每天子巡守之明年  
 東方朝春明年南方朝夏又明年西方朝秋又明年北  
 方朝冬又明年則天子巡守矣歲徧者言凡四歲而徧  
 非一歲也**敷奏以言明試以功車服以庸****疏**史遷敷奏作徧

告敷一作傳**疏**史公敷為徧者詩傳云敷猶徧也奏為  
 告者書大傳注云奏猶白白之義與告

相近言使諸侯徧以治術奏告也漢書宣帝紀云傳奏  
 其言考試功能注應邵云傳陳也各自奏陳其言然後  
 試之以官考其功德也說文云試用也虞書曰明試以  
 功白虎通考績篇云禮說九錫車馬衣服樂則朱戶納

陞虎賁鈇鉞弓矢矩矱皆隨其德可行而賜能安民者  
賜車馬能富民者賜衣服書曰明試以功車服以庸

肇十有二州○馬融曰禹平水土置九州舜以冀州之

北廣大分置并州燕齊遼遠分燕置幽州分齊為營州

於是為十二州也鄭康成曰舜以青州越海而分齊為

營州冀州南北太遠分衛為并州燕以北為幽州新置

三州并舊為十二州也封十有二山濬川○史遷無封

十有二山濬作決大傳說惟元祀巡守四嶽八伯壇四

與沈四海封十有二山兆十有二州濬川鄭康成曰更

為之定界濬水害也○史公濬作決者說文云處深通

濬川也或作決古文作濬周語云

爲川者決之使導經文肇十有二州封十有二山夫傳  
虞傳以爲巡守時事二句互相前後肇作兆蓋今文說  
也鄭注太傳不與注此經同云祭者必封封亦壇也十  
有二山十有二州之鎮也兆域也爲營域以祭十有二  
州之分星也壇沈封兆皆因所宜爲之云十有二山十  
有二州之鎮者周禮職方氏九州皆有山鎮揚州會稽  
荆州衡山豫州華山青州沂山兗州岱山雍州嶽山幽  
州醫無閭冀州恒山并州昭餘祁凡九山唐虞十有二  
州則山鎮當十有二無文可知云兆域者說文作兆畔  
也爲四時界祭其中詩商頌云肇域彼四海鄭箋云肇  
當作兆則此肇亦當爲兆也云爲營域以祭十有二州  
之分星者淮南天文訓星部地名云角亢鄭氏房心宋  
尾箕燕斗牽牛越須女吳虛危齊營室東壁衛奎婁魯  
胃昂畢魏觜嚙參趙東井與鬼秦柳七星張周翼軫楚  
又鄭注周禮引堪輿十二次星紀屬吳越等星經以五  
星主九州又有斗九星主九州卽此所謂分星也鄭蓋  
兼用今文說而未以之注經經文作肇者釋詁云始也  
漢書谷永傳永奏日堯遭洪水之災天下分絕爲十二

州言肇者自此始分之馬注見史記集解云舜分十二州不云堯者堯時分絕為十二州如鄭云舜更為之定界也云禹置九州者禹貢之九州冀兗青徐揚荆豫梁雍也爾雅則有幽營無青梁請備以為成制周禮則有幽并無徐梁此三代之制各不同也鄭注見史記集解及爾雅釋地釋文與馬義畧同鄭注大傳用今文說法此經殆用衛賈孔壁古文

象以典刑

馬融曰言咎繇制

五常之刑無犯之者但有其象無其人也

象者畫象也

云常也漢書武帝紀元光元年詔曰昔在唐虞畫象而民不犯周禮司圖疏引孝緯云三皇無文五帝畫象三王肉刑畫象者上罪墨象精衣雜屨中罪赭衣雜屨下罪雜屨而已荀子正義篇云古無肉刑而有象刑漢書刑法志云禹承堯舜之後自以德衰而制肉刑漢武順而行之者以俗薄於唐虞故也是明唐虞無肉刑鄭注周禮司圖云弗使寇飾者著墨象者古之象刑與知刑氏亦信象刑之說也馬注見史記集解以典為常故云

皋陶制五刑之刑實則此時皋陶未制刑也疑是皋陶  
謨方施象刑之注裴氏銀附于此云五常之刑周禮大  
司徒之職以辨八刑糾萬民一曰不孝之刑二曰不睦  
之刑三曰不姻之刑四曰不弟之刑五曰不任之刑注  
鄭司農云任謂朋友是此八刑之五因五常而設疑即  
馬義也白虎通五刑篇云五刑者五常之鞭策也云但  
有其象無其人者言無犯  
之惟有畫衣冠之象耳

流宥五刑馬融曰流宥宥  
寬也一曰幼少二曰老耄三曰蠢愚五刑墨劓剕宮大

辟鄭康成曰五刑墨劓剕宮大辟正刑五加之流宥鞭

朴贖則此之謂九刑其輕者或流放之四罪是也

有少昊時九黎之君苗民所作呂刑謂之五虐之刑劓  
剕椽黥等是也堯時則畫衣冠以象之存其名目而已  
荀子正義篇云墨黥髡嬰其艾畢非對屢殺赫衣而不  
純楊倞注引慎子其詞未全太平御覽六百四十五引

慎子云有虞氏之誅以幘巾當墨以草纓當劓以菲履當別以艾鞞當官布衣無領當大辟此有虞之誅也斬人臍體擊人肌膚謂之刑畫衣冠異章服謂之戮上世用鐵而民不犯也當世用刑而民不從此象刑之大畧慎子及文選漢武賢良策注引墨子亦言之者書刑法志云三皇設言而民不違五帝書象而民知禁則書所謂象以典刑流宥五刑鞭作官刑朴作教刑者也然則犯黔者息其中犯劓者丹其服犯膺者墨其體犯官者縲其屨大辟之罪殊刑之極布其衣裾而無領緣投之於市與衆弃之此唐已前經說也馬注見史記集解釋文引宥寬也作三省也云流放者鄭注王制同宥寬詩傳文云三省一日幼少云云者周禮司刺掌三刺三省三赦之法一宥曰不識再宥曰過失三省曰遺忘馬氏所云以三赦為三省亦見司刺職廣雅釋言云宥赦也是可通云墨劓刑官大辟者周禮司刑注引書傳云決關梁踰城郭而畧盜者其刑膺男女不以義處者其刑膺傷身君命革與服制度姦軌盜擄傷人者其刑劓非事而事之出入不以道義而誦不祥之辭者其刑墨降

畔賊劫畧奪攘矯虔者其刑死此則五刑之條目亦飾其象以待犯者而已又以流放及三宥之法宥之故大傳又稱唐虞象刑而民不敢犯苗民用刑而民興犯漸也知此五刑為畫象者經文列于鞭朴之前見其輕于傷體膚也鄭注見周禮司刑疏鄭說九刑以流宥為一與鞭朴贖刑而四則五刑為九春秋左氏文十八年傳云在九刑不忘是也案昭六年傳又云周有亂政鞭作而作九刑不應以說唐虞象刑之制鄭氏失之

**官刑**

**注**

馬融曰為辨治官事者為刑

**疏**

馬注見史記集解云為辨治官

事者為刑者魯語云薄刑用鞭朴注鞭官朴作教刑

鄭康成曰朴槓楚也朴為教官為刑者

**疏**

鄭注見史記集解云朴槓

楚者學記云槓楚二物收其威也注云槓槓也楚荆也二者所以朴撻犯禮者案犯禮是不率教故云為教官

也為刑

**金作贖刑**

**注**

馬融曰金黃金也意善功惡使出金

贖罪坐不戒慎者

**疏**

金以贖罪古用銅赤金也周禮職

案金可用以鑄兵淮南汎論訓云齊桓公將欲征伐甲

兵不足令有重罪者出犀角一戟有輕罪者贖以金分

訟而不勝者出一束箭是金可鑄兵非黃金矣馬注見

史記集解云黃金者本漢法說經也書疏引鄭氏駁異

義云贖死罪千鏹鏹六兩大半兩為四百一十六斤十

兩大半兩銅與今贖死罪金三斤為價相依附是古贖

罪皆用銅也云意善功惡者功謂事也如過失殺

人之類然贖罪則死刑亦可贖固不止如馬所說

**肆赦** 史遷災作裁肆作過鄭康成曰青災為人作患

害者也過失雖有害則赦之

**疏**

青災者春秋左氏莊廿

不鼓注青猶災也是日月之食謂之青乾象通鑑七引

尚書緯曰當赦不赦月為之食是今文有說此書災為

月食者開元占經引石氏曰若月行疾則君刑緩行遲

則君刑急故人君月有變則省刑齊曰青災肆赦穀梁



莊二十二年經肆大管傳云肆失也書契也注云易解  
 赦過省罪書稱管災肆赦經稱肆大管皆赦罪人如  
 其說則肆當讀如肆大管之肆釋文木作失謂縱佚之  
 也又杜氏注左傳云肆緩也緩即寬宥之意漢魏諸儒  
 堅持救非善政之說并此經義則落之然經之言赦不  
 一而足平法之代自可不赦若遇淫刑之時賴有赦以  
 補救天災人怨未可執偏見也史公災為裁者說文云  
 裁猶文作災肆作過者古文異字鄭注見史記集解以  
 管災為作患害者康詒云乃有大罪非終乃惟管災時  
 乃不可殺鄭用此義以管為患災為害也云過失雖有  
 害則赦之鄭本肆亦**怙終賊刑**鄭康成曰怙其姦邪  
 作過故隨文解之也

終身以為殘賊則用刑之終一作眾也怙者釋言云恃  
 也鄭注見史記

集解以終為終身賊為殘賊周禮大司寇疏引孝經援  
 神契五刑章云刑者例也過出罪施者下例為善也行  
 刑者所以著人身體過誤者出之實罪者施刑是詳尚  
 書云管災肆赦怙終賊刑案賊者高誘注呂氏春秋云

殺也經云怙終賊刑言有所恃而終不改過者如賊殺人之刑不赦之也鄭以賊字屬怙終解疑非此有虞氏之施刑雖不赦亦衣之畫象而已終史記集解徐廣曰一作衆則言恃衆作亂也 欽哉欽哉惟

刑之恤哉 史遷說恤作靜恤一作謚 再言欽哉者敬之又敬恤

者鄭注周禮云謂災危相憂孫炎注釋詁云救之憂也漢書刑法志元帝初立乃下詔曰書不云乎惟刑之恤哉其審核之是古文作恤也史公恤為靜者詩周頌云假以溢我春秋傳引作何以恤我釋詁云溢慎也又詩閔宮云閔宮有血傳云血靜也故恤亦靜也恤作謚者史記集解引徐廣曰今文作謚爾雅曰謚靜也釋詁作謚

流其工于幽洲 史遷洲作陵云以變北狄馬融曰

北裔也洲一作州一作都 史公云以變北狄集解引徐日變一作變蓋放流之

欲其變和北狄之風俗不為困苦其身也何休注公羊云古者刑不上大夫故有罪放之而已也馬注見史記

集解洲俗字孟子作州史記正義曰尚書及大戴禮皆作幽州莊子在宥篇作幽都釋文云尚書作幽州則此洲後人所改史記正義引括地志云故冀城在檀州燕樂縣界故老傳云舜流共工幽州居此城放驩

兜于崇山注史遷云以變南蠻馬融曰南裔也疏見馬注

記集解太平御覽四十九引盛宏之荊州記曰書云放驩兜于崇山崇山在禮陽縣南七十五里窳三

苗于三危注史遷窳作遷云以變西戎馬融曰西裔也

三苗國名也緡雲氏之後為諸侯蓋鬻鬻也窳一作敦

史公窳為遷者窳遷聲相近故亦為遷周語云自窳於我狄之間馬注見史記集解及釋文云緡雲氏之後者高誘注淮南修務訓云三苗蓋謂帝鴻氏之裔子渾敦少昊氏之裔子窮奇緡雲氏之裔子鬻鬻三族之苗裔故謂之三苗一名曰放三苗國民於三危此與為鄭說獨以緡雲氏之後為三苗者異未知其審後漢書

西羌傳云舜流四凶徒之三危河關之西南老是也注  
三危山在今沙州敦煌縣東南山有三峯曰三危也案  
章懷注與漢書本文不相應河關之西卽鄭注所云三  
危在岷山之西南非沙州之三危也竄一作馭者說文  
云塞也讀若虞書曰黜三苗于殛鯀于羽山史遷云  
三危孟子又作殺者彙字之省

以變東夷馬融曰殛誅也羽山東裔也

馬注見史記集解云殛誅

者釋言文說文誅作殊蓋誤字誅者責遣之非殺也漢  
書鮑宣傳云昔堯放四罪而天下服是殛卽放也祭法  
疏引鄭志荅趙商云鯀非誅死鯀放居東裔至死不得  
反于朝禹乃其子也以有聖功故堯興之若以爲殺人  
父用其子而舜禹何以忍乎而尙書云鯀則殛死禹乃  
嗣興者箕子見武王誅紂今與已言懼其意有慙德爲  
說父不肖其罪子賢則舉之以滿武王意也案舜之殛  
鯀方將使之變和東夷必非置之死地箕子云殛死亦  
謂殛之遠方而至死不反故楚辭天問云永遏在羽山  
夫何三年不施言久遏絕之不施捨也不必謂滿武王

之意而言云羽山東裔者地理志東海祝其禹貢羽山  
在南縣所縣山在今山東鄒城縣東北七十里江南黃  
榆縣界 **四罪而天下咸服** **史遷罪**作舉鄭康成曰左傳

帝鴻氏不才子謂之渾敦少皞氏不才子謂之窮奇顓  
頊氏不才子謂之檮杌緡雲氏不才子謂之饕餮命驩  
兜舉共工則驩兜爲渾敦也共工爲窮奇也鯀爲檮杌  
也而三苗爲饕餮可知禹治水事畢乃流四凶舜不刑

此四人者以爲堯臣不忍刑之 **史**云舉公罪爲舉者說文  
似皇字改爲罪鄭注見書疏云鄭氏具引左傳之文鄭  
以驩兜爲渾敦云云者春秋左氏文十八年疏云堯典  
帝言共工之行云靖言庸違傳說窮奇之惡云靖諧庸  
同二文正同知窮奇是共工也堯典帝求賢人驩兜舉

其工應帝是與共工相比傳說渾敦之惡云醜類惡物是與比周知渾敦是驩兜也堯典帝言鯀行云弗哉方命圯族傳說禱杙之罪云告頑舍懼傲很明德卽是弗戾圯族之狀且鯀是顓頊之後知禱杙是鯀也尙書無三苗罪狀旣甄去三凶自桀饗舜是三苗矣先儒盡然蓋無異說是與鄭義同也 二十有八載

帝乃殂落百姓如喪考妣三載四海遏密八音史遷

說爲堯立七十年得舜二十年而老令舜攝行天子之

政薦之於天堯辟位凡二十八年而崩百姓悲哀如喪

父母三年四方莫舉樂以思堯帝一作放勛遏一作闕

**疏**二十唐石經作廿字帝當爲放勛二字或梅氏作僞傳旣不以放勛爲堯名則并改此文爲帝孟子引堯

典作放勳春秋繁露煖煥孰多第五太平御覽八十四引五經通義皆作放勳說文殂往死也虞書曰勛乃殂

漢書王莽傳引書曰過宮注師古曰虞書放勳乃  
 徂云云是唐已前本尚有作放勳者則知放勳作帝字  
 自孔氏穎達正義本用之也徂落者釋詁云死也百姓  
 羣臣也江氏聲云四海乃謂民間則百姓自是羣臣矣  
 喪者白虎通崩薨篇云不直言死稱喪者孝子之心不  
 忍言也釋親云父為考母為妣三載當為三年孟子春  
 秋繁露等皆引作年偽孔因爾雅唐虞曰載之文改之  
 也過者釋詁云止也密者釋詁云靜也春秋繁露過作  
 闕八音者白虎通禮樂篇云樂記曰土曰墳竹曰管皮  
 曰鼓匏曰笙絲曰弦石曰磬金曰鐘木曰祝敔此謂八  
 音也案墳作于周時唐虞八音蓋鼓兼皮土二音周禮  
 籥章掌土鼓注杜子春云土鼓以瓦為匡以革為兩面  
 可擊也又周語單穆公言八音以瓦易土知白虎通所  
 說八音非古也史公云堯立七十年得舜者據經朕在  
 位七十載之文云二十年而老又八年而崩故集解引  
 徐廣曰堯在位凡九十八年也史記正義引皇甫謐云  
 堯即位九十八年通舜攝二十八年也凡年百一十七  
 歲案皇甫謐之言不足為據堯本紀集解又引謐曰堯

以甲申歲生甲辰卽帝位甲午徵舜甲寅舜代行天子  
事辛巳崩年百十八在位九十八年僞傳云堯年十六  
卽位皆造言也論衡氣壽篇云堯典曰朕在位七十載  
求禪得舜舜徵三十歲在位堯退而老八歲而終至殂  
落九十八歲未入位之時必已成入今計百有餘歲矣  
案漢人不知堯之年歲至晉何由知之皇甫謐不足信  
明甚以考妣爲父母者曲禮云生日父曰母死曰考曰  
妣是也史記集解引皇覽云堯冢在濟陰城陽今山東  
濮州有堯冢

月正元日舜格于文祖

史遷格作至

改建子之月爲正也元者釋詁云始也說見上正月上  
日鄭注云文祖者明堂祭法云有虞氏祖顓頊而宗堯  
注云祭五帝五神於明堂曰祖宗祖宗通言耳孝經云  
宗祀文王於明堂以配上帝太平御覽五百卅三引孝  
經授神契云明堂有五室天子每於其室聽朔布教祭  
五帝之神配以有功德之君案此知舜畢堯喪至于文  
祖是宗祀堯于明堂以赤帝配也史記正義云火精光  
明文章之祖故謂之文祖史公格爲至者釋詁文江氏



聲云下文命官授職是明堂之事 詢于四岳闕四門明四目達四聰

**注**

史遷詢作謀闕作辟又說為明通四方耳目鄭康成日

卿士之職使為已出政教于天下言四門者亦因卿士

之私朝在國門魯有東門襄仲宋有桐門右師是後之

取法于前也 **疏**漢書梅福傳福上書云博覽兼聽謀及

門明四目也史公詢為謀者釋詁文以明目達聰為明

通耳目四為四方者亦謂明堂之四門也明堂宮垣有

四門闕之所以明通視聽鄭注見詩緇衣疏 咨十有二牧 **注**史遷咨作命 **疏**

十二牧者曲禮云九州之長入天子之國日牧注云每一州之中天子選諸侯之賢者以為之牧也白虎通封公侯篇云州伯何謂也伯長也選擇賢良使長一州故謂之伯也唐虞謂之牧者何尚質使大夫往來牧諸侯

旁立三人凡十二人尚書曰咨十有二牧何知堯時十有二州也以禹貢言九州也漢書薛宣朱博傳何武與丞相方進共奏言古選諸侯賢者以為州伯

曰食哉

書曰咨十有二牧所以廣聰明燭幽隱也

食者方言云勸也廣雅釋詁同爾雅釋詁云食偽也案偽即為也言勸使有為魏志華佗傳云佗持能厭食事

言厭為也惟時柔遠能邇

邇說苑君道篇云十二牧方之人故牧者所以辟四門明四目達四聰也是以近者親之遠者安之釋詁云柔

安也邇近也能讀當為而而如也言安遠國如其近者漢督郵班碑作深遠而邇而如通字說苑以親訓能趙

岐注孟子親愛也漢書注師古曰能善也義相近鄭注見詩民勞釋文云恣者民勞詩柔遠能邇箋云能猶仰

也安遠方之國順仰其近者仰即如字高誘注

元而難任人蠻夷率服注史遷說為論帝德行厚德遠

卷之二十一 下 卷

佞人

**佞**

史公說為論帝德者已下皆述堯之德信賢遠

文允者釋詁云信也元者文言云善之長也史公以難

為遠任為佞者釋詁云阻難也阻有遠意又云任佞也

蠻夷率服率者釋詁云循也案舜時即位于明堂四方

諸侯及蠻夷皆來朝與助祭故史公又云於是四門闢

言母凶人也天子耳目不能周徧四方故勉十二牧以

助聰明厚德信善屏遠凶人則蠻夷循服皆明堂布政

之舜曰咨四岳有能奮庸熙帝之載使宅百揆亮采惠

**疇**

史遷熙作美載作事宅百揆作居官亮采作相事

馬融曰奮明庸功也鄭康成曰誠行也

**疏**

史公熙為美

成熙漢書律歷志作眾功皆美載為事者周書諡法解

文宅為居者釋言文百揆為官者經文納于百揆史公

百揆亦作百官亮為相者釋詁云亮相導也是亮相同

義采為事者釋詁文馬注見史記集解云奮明者明勉

也謂奮勉云庸功釋詁云庸勞也勞卽功鄭注見書疏  
云載行者周語韋昭注亦云案經云奮庸者廣雅釋詁  
云奮進也言進用經云惠疇者釋言云惠順也易九家  
注云類也言居官相事順其疇類上言厚德信善拒佞  
人皆堯之美行故思得賢以繼之也詩魯頌閟宮疏云  
謂舜命羣官使禹宅百揆卽天官也天官冢宰六卿之  
長事無不統舜本由百揆進而居攝今卽位  
命官使禹宅百揆欲其由冬官居此職也

僉曰伯禹

作司空

史遷作皆曰又作爲司空說爲可美帝功今

尙書夏侯歐陽說天子三公一日司徒二日司馬三日  
司空九卿二十七大夫八十一元士凡百二十在天爲  
山川鄭康成曰初堯冬官爲共工舜舉禹治水堯知其  
有聖德必成功故改命司空以官名寵異之非常官也

至禹登百揆之任捨司空之職為其工與虞故曰垂作

其工益作朕虞是也

**疏**經稱伯禹者蓋是時禹已襲蘇爵為伯矣史公僉為皆者釋詁

文作訓為者釋言文說為可美帝功者蒙上文今尚書夏侯歐陽說見北堂書鈔五十引五經異義云在天為

山川當是在天為星辰在地為山川脫文大傳云天子三公一日司徒公二日司馬公三日司空公溝瀆雍過

水為民害則責之司空注云與司寇司空同職者謂之司空公白虎通封公侯篇云司馬主兵司徒主人司空

主地又云司空主土不言土言空者空尚主之何況於實以微見著鄭注見周禮疏序云初堯冬官為其工者

鄭上文注云其工水官名是即冬官也云堯改命司空以寵異禹者經文司空之名始見于此北堂書抄五十

引尚書刑德放日益為司馬禹為司徒禹為司空淮南齊俗訓及說苑君道篇皆云堯之時舜為司徒契為司

馬禹為司空后稷為大田師奚仲為工是也云禹登百揆之任捨司空之職為其工與虞者周禮司空主事故

共工屬司空若山虞澤虞皆屬司徒鄭以虞與其工並  
言者以禹隨山刊木暨益奏庶鮮食則禹實兼虞而益  
佐之也案馬氏注前堯典俱以為謚引謚法文則此當  
有云禹謚也受禪成功曰禹蓋脫文今本謚法亦為後  
人刪

帝曰俞咨禹汝平水土惟時懋哉

**注**史遷俞作然

咨作嗟懋作勉馬融曰懋美也

**疏**史公俞為然者釋言  
文咨為嗟者釋詁文

懋為勉者釋詁云茂勉也懋音近茂馬  
注見釋文云懋美者詩傳云茂美也

禹拜稽首讓于

稷契暨皋陶

**注**史遷暨作與鄭康成曰稷棄也初堯天

官為稷禹登用之年舉棄為之時天下賴后稷之功故

以官名通稱舉八元使布五教契在八元中暨一作臬

**疏**

稽者說文作誥云下首也鄭注周禮云稽首拜頭至  
地也讓為讓假借字說文云推也史公暨為與者釋

詁文說文作泉云衆詞與也鄭注見周禮疏序詩生民  
疏書疏云初堯天官爲稷者詩闕官箋云后稷生而名  
棄長大堯登用之使居稷官民賴其功後雖作司馬天  
下猶以后稷稱焉疏引尙書刑德放云稷爲司馬案白  
虎通封公侯篇云別名記云司徒典民司空主地司馬  
順天是司馬亦名天官也云舉八元使布五教契在八  
元中者春秋左氏文十八年傳疏云尙書契敷五教  
此云舉八元使布五教以此故知契在八元中也

曰俞汝往哉注史遷俞作然鄭康成曰然其舉得其人

汝往居此官不聽其所讓疏史公俞爲然者見前帝曰

棄黎民阻飢汝后稷播時百穀注史遷祖作始馬融曰

祖始也鄭康成曰阻讀曰俎阻戾也時讀曰蒔始者洪

水時衆民戾于飢汝居稷官種蒔五穀以救活之阻一

作祖

**疏**

黎者釋詁云衆也后者漢書百官表注應劭曰

時者是也史公說祖為始者集解引徐廣曰今文尙書

作祖飢祖始也馬注見詩釋文鄭注見詩思文疏云阻

也云時讀為蒔者說文蒔更別種漢書食貨志阻作祖

蓋今文字詩閔宮疏云舜命羣官使禹宅百揆即天官

也契任五教為司徒即地官也伯夷為秩官即春官也

咎繇為士即秋官也垂為共工即冬官也唯夏官不言

命而上句禹讓稷契之下帝曰棄黎民阻飢汝后稷播

時百穀褒述其為稷之功不言命而為官明是

稷為司馬為夏官也案此以周禮說虞官也

帝曰契

百姓不親五品不遜汝作司徒敬敷五教在寬

**注**史遷

遜作馴一重五教二字馬融曰五品之教鄭康成曰五

品父母兄弟子也契一作僕一作禹遜一作慙一作訓



**的** 契說文作𠄎云高辛氏之子堯司徒殷之先又云禹  
 讀與俱同古文作禹漢書百官表作禹親者一切經  
 音義九引倉頡篇云愛也遜者詩箋云順也史公遜作  
 馴者索隱曰史記馴字徐廣皆讀日訓訓順也漢書霍  
 光傳云五品以順注師古曰順理也重五教二字見史  
 記殷本紀此五帝本紀不重者蓋古人重字輒于字下  
 加二後人誤刪之後漢書鄧禹傳策曰百姓不親五品  
 不訓汝作司徒敬敷五教五教在寬順帝紀章懷太子  
 賢注及詩商頌譜引書皆重五教二字唐石經五教下  
 疊二字尙可辨是近本始脫之也馬注見史記集解鄭  
 注同云五品父母兄弟子者鄭語史伯曰商契能合和  
 五教以保于百姓者也注云五教謂父義母慈兄友弟  
 恭子孝也遜說文作遜  
 帝曰皐陶蠻夷猾夏寇賊姦宄

史遷宄作軌鄭康成曰猾夏侵亂中國也強取爲寇殺  
 人爲賊由內爲姦起外爲軌皐陶一作咎繇猾一作滑

究一作軌

**疏**

史公究作軌者魯語里革曰毀則為賊竊

軌後漢書李固傳注引經亦作軌是軌為究借字也

注見史記集解及周禮司刑疏以猾為侵亂夏為中國

者猶大傳作滑滑夫論志氏姓篇亦引作滑韋昭注周

語云滑亂也猾从允蓋借過字後人譌从犬夏者說文

云中國之人也云強取為寇者鄭注費誓云寇劫取也

義同云殺人為賊者呂氏春秋過理云沮麋見之不忍

賊注云賊殺也云由內為姦起外為軌者說文云究姦

也外為盜內為究究古文作交怨晉語長魚矯曰亂在

內為軌在外為姦鄭注蓋互誤引之

者舛也臯陶為咎繇見漢書百官志

獄官之長鄭康成曰士察也主察獄訟之事

**疏**大傳云蠻夷滑

夏寇賊奸究則責之司馬白虎通封公侯篇云司馬主

兵不言兵言馬者馬陽物乾之所為行兵用焉不以傷

害為文故云馬也則臯陶為司馬三公之職故鄭釋士

為察不以為士師之士也馬注見史記集解云獄官之

長與漢書百官表應劭注同周禮士師在小司寇之下  
 而云獄官之長者唐虞三公無司寇之名其刑官名士  
 即當周之司寇故今文以為司馬主兵說苑修文篇云  
 皋陶為大理明士非士師也鄭注見書疏云士察者釋  
 文詁

**五刑有服五服三就**

**注**

馬融曰五刑墨劓剕宮大辟

三就謂大罪陳諸原野次罪于市朝同族適甸師氏既

伏五刑當就三處鄭康成曰三就原野也市朝也甸師

氏也

**疏**

五刑有服者服謂畫衣冠五者見上三就者就

虞象刑而民不敢犯苗民用刑而民與犯漸唐虞之象  
 刑上刑赭衣不純中刑雜屨下刑墨矇以居州里而民  
 恥之而反於禮所謂五刑之服有上中下三等故云三  
 就法言云唐虞象刑惟明夏后肉辟三千古說無以五  
 刑為肉辟者馬注見史記集解鄭注見書疏魯語臧文  
 仲云大刑用甲兵其次用斧鉞中刑用刀鋸其次用鑽

笞薄刑用鞭朴故大者陳之原野小者致之市朝五刑  
三次注次處也三處野朝市也案馬鄭注三就皆用此  
文而以市朝為一增出甸師氏蓋以周法言之不如韋  
注之當也漢書刑法志說臯陶謨五刑五用亦同魯語  
太平御覽七百六十引大傳云古者中刑用鑕鑿而  
脫其全文是今文有以五刑為肉辟者江氏聲云蠻夷  
猾夏寇賊姦宄豈象刑足以威之乎則五刑自當有甲  
兵斧鉞矣至於刀鋸鑕笞有苗制是刑唐虞有是象其  
時民之重恥其畏象刑尤甚于畏肉  
刑罕有犯者然則制固不可廢也

五流有宅五宅三

居注史遷宅俱作度馬融曰謂在八議君不忍刑宥之

以遠五等之差亦有三等之居大罪投四裔次九州之  
外次中國之外鄭康成曰宅讀曰咤懲刈之器謂五刑  
之流皆有器懲刈五咤者是五種之器謂桎一梏二羇

三三處者自九州之外至于四海三分其地遠近若周

之夷鎮蕃也

**疏**

史公宅俱為度者王制云度地以居民

不帥教者以告不變命國之右鄉移之左國之左鄉移

之右不變移之郊不變移之遂不變屏之遠方又云屏

之遠方西方曰棘東方曰寄注云帥循也不循教謂傲

狠不孝弟者遠方九州之外棘當焚焚云言偪使之偪

寄於夷戎不屏於南北為其太遠案王制殷禮所本古

矣疑可以說此五宅三居又王制云公家不畜刑人屏

之四方唯其所之不及以政示弗故生也鄭注引此經

五流有宅似謂左右鄉一郊二遂三遠方東西二為五

也三居者郊遂遠方也晉書刑法志云舜命臯陶曰五

刑有服五服三就五流有宅五宅三居方乎前古事既

參陪則謂五刑有服即象以典刑五流有宅即流宥五

刑增出三就三居故云參陪前古也馬注見史記集解

云在八議者周禮小司寇職議親議故議賢議能議功

議貴議勤議賓之入辟以周法推虞制云四裔者若四

罪九州之外者萬里之外中國之外者五千里之外也  
鄭注見史記集解王制疏及書疏云宅讀曰咤懲刈之  
器者廣雅釋詁云懲愷恻也宅與度通愷卽度字俗加  
心是宅爲懲刈之義咤卽叱字云桎一桎二桎三者江  
氏聲云爲數不符案周禮掌囚云上罪桎拳而桎中罪  
桎桎下罪桎王之同族拳有爵者桎鄭言五種其此之  
謂與云若周之夷蕃鎮者見周禮職方氏九服之辨  
鄭注大行人職亦云九州之外夷服鎮服蕃服也

**明克允****注**史遷作維明能信馬融曰當明其罪能使信

服之鄭康成曰此三官是堯時事舜因禹讓述其成功

**疏**史公克作能允作信者見上疏馬注見史記集解鄭  
注見周禮疏序云三官者稷契臯陶也云堯時事者

春秋左氏文十八年傳云舜臣堯舉八  
帝曰疇若予工  
愷舉八元則此三人皆堯時舉用者

**注**史遷疇作誰若作馴馬融曰謂主百工之官也  
**疏**史公

疇為誰者釋詁文說文屬誰也馴同  
順釋言云若順也馬注見史記集解  
僉作皆帝曰俞咨垂汝共工  
僉曰垂哉史遷

工之事疏馬注見史記集解云共理百工之事者漢書  
百官表應劭注畧同冬官共百工之事禹為

之既升宅百揆此垂拜稽首讓于殳斨暨伯與帝曰俞

官又當求賢也疏及一作朱伯與一作柏譽疏及作朱伯與

往哉汝諧注及一作朱伯與疏及作朱伯與

漢書古今人表或說諧者偕也帝曰疇若子上下草木

鳥獸注史遷若作馴馬融曰上謂原下謂隰草一作少

疏馬注見史記集解云上謂原下謂隰者公羊昭元年

任益虞而上下和少木茂又谷永傳引庶少蕃滋注師  
古曰少古草字也案說文少艸木初生也古文或以為

艸字讀 僉曰益哉注史遷僉作皆馮鄭僉曰作禹曰益

一作菘帝曰俞咨益汝作朕虞注史公為皆者釋詁

疏漢書百官表益作朕虞注應劭曰虞掌山澤禽獸官

名也羽獵賦益者禹任益虞亦以僉為禹益作菘者見

漢書百官表說文益拜稽首讓于朱虎熊羆注朱虎熊

名春秋左氏文十八年傳高辛氏有才子八人有伯虎

仲熊叔豹季狸古今人表作相虎仲熊叔豹季熊熊當

為羆字師古曰即左帝曰俞往哉汝諧注史遷說遂以

傳所謂季狸者也 朱虎熊羆為佐疏史公說以朱虎熊羆為佐 帝曰咨四

岳有能典朕三禮注馬融曰三禮天神地祇人鬼之禮 鄭康成曰天事地事人事之禮也疏典與敷同說文云



云典主也馬注見史記集解云天神地祇人鬼之禮者周禮大宗伯之職掌建邦之天神人鬼地祇之禮以佐王建保邦國是也鄭說見史記集解僉曰伯夷帝曰俞咨伯汝作秩宗

史遷僉作皆俞作嗟咨伯作伯夷鄭康成曰主次秩尊

卑疏經文咨伯者白虎通王者不臣篇云王者臣有不名者五先王老臣不名親與先王戮力其治國同

功於天下故尊而不名也尚書曰咨爾伯不言名也不名者貴賢者此蓋今文說史公則作嗟伯夷是古文有夷字鄭注見

史記集解夙夜惟寅直哉惟清注史遷寅作敬清作

靜潔疏夙早寅敬釋詁文史公清作伯拜稽首讓于夔靜潔者說文澣無垢穢也

龍帝曰俞往欽哉注史遷俞作然帝曰夔命汝典樂教

胄子注史遷胄作禨馬融曰胄長也教長天下之子弟

鄭康成曰國子也胄一作育

**疏**

經言胄子者詩崧高疏引說文云胄允也禮謂

適子為胄子今本說文脫下七字王制云樂正崇四術立四教注引經文云幼者教之於小學長者教之於大學尚書傳曰年十五始入小學十八入大學王制又云王太子羣后之太子卿大夫元士之適子國之俊選皆造焉是胄子為適子也漢書禮樂志云國子者卿大夫之子弟也皆學歌九德誦六詩習六舞五聲八音之和故帝舜命夔曰女典樂教胄子云云史公作穉者詩谷風疏引爾雅釋言育稚也今爾雅育作鞠鴟鴞釋文引郭璞音義曰鞠一作毓說文作育子云養子使作善也詩幽風鸛子之閔斯傳云鸛子稚子也是胄子適子為古文說釋子育子今文說也馬注見釋文以教胄為教長用今文說鄭注見史記集解以胄子為國子用古文說也王氏引之云凡未冠者通謂之穉子穉子即育子內則曰十有三年學樂誦詩舞勺成童舞象周書大子晉解云人生而重丈夫謂之胄子胄子成人能治上官謂之士亦謂未冠者為胄子也孔氏穎達誤以為適長

子而史記之教穉子更莫有通其義者矣案直而溫寬此亦今古文說不同王氏合而一之亦非也

而栗**注**馬融曰正直而色溫和寬大而敬謹戰栗也**疏**

寬者東方之行洪範云木曰曲直是也溫者詩傳云和

柔貌性行直者勝之以柔寬者西方之行漢書翼奉傳

云西方之情喜行寬大栗者聘義云縝密以栗注堅貌

性行寬大者勝之以堅栗溫和為春生堅栗為秋成此

言仁義所本也馬注見史記集解表記云寬而有辯注

云辯別也猶寬而栗也是言寬而有分別詩箋云栗析

也古者聲栗裂同也則鄭以栗為分析與辯別義相近

也梗直者加以溫和寬厚者加以明辨性以相反者相

成剛而無虐簡而無傲**注**傲一作敖**疏**虐者高誘注淮

也剛而無虐簡而無傲**注**傲一作敖**疏**南云害也簡者

詩傳云大也傲者說文云倨也乾剛地簡古教學必先

治性情法天地四時于虞書為四德臯陶謨為九德洪

範為三德此大學之詩言志歌永言**注**史遷志作意永

道也傲漢志作敖

作長馬融曰歌所以長言詩之意也歌一作哥永一作

詠師教國子以和平性情乃可與言樂詩序云詩者志之所之也在心為志發言為詩樂記云歌之為言

也長言之也說之故言之言之不足故長言之歌一作哥永說文云詠或作咏漢書藝文志作詠引書曰詩言

志哥詠言故哀樂之心感而哥詠之聲發誦其言謂之詩詠其聲謂之哥哥者說文云聲也古文以為詠字禮

樂志作歌咏言聲依咏史公志為意者鄭注檀弓聲依云志意也永為長者釋詁文馬注見史記集解

永律和聲注鄭康成曰聲之曲折又依長言聲中律乃

為和也注聲者高誘注淮南子時則訓云絲竹金石之聲也律者陽聲六為律陰聲六為呂陽統陰

故言律以該呂也賈子傳職篇云號呼謠謠音聲不中律燕樂雅訟逆樂序凡此其屬詔工之任也說文云蘇

譌也讀與和同鄭八音克諧無相奪倫神人以和注史注見史記集解

遷克作能鄭康成曰祖考來格羣后德讓其一隅也諧

一作齠

**齠**

音者詩序云聲成文謂之音箋云聲謂宮商

記云雜比曰音單出曰聲記又云審聲以知音審音以

知樂則聲音不同也鄭注見史記集解以臯陶謨文說

神人也祖考為神羣后為人諧說文作夔曰於子擊石

齠云樂和齠也引此經文又云侖理也夔曰於子擊石

拊石百獸率舞

**注**

鄭康成曰石磬也百獸服不氏所養

者也率舞言音和也謂聲音之道與政通焉

**說**

於釋文曰如字

或音烏而絕句者非也史記正義云於音烏不可從石

者說文云磬樂石也拊者說文云拊也周禮太師職云

令奏擊拊注鄭司農云樂或當擊或當拊率者釋詁云

循也鄭注見公羊哀十四年傳疏及史記集解云百獸

服不氏所養者周禮夏官服不氏掌養猛獸而教擾之

注云服不服不服之獸者猛獸虎豹熊羆之屬云音聲

之道與政通  
焉樂記文  
帝曰龍朕聖讒說殄行震驚朕師

聖作畏忌行作偽震作振師作衆馬融曰殄絕也  
子之行鄭康成曰所謂色取仁而行違是驚動我之衆

臣使之疑惑  
**疏** 聖者說文引此經文云疾惡也史公云

云齊說殄行振驚衆五帝本紀生而徇齊索隱引尚書  
大傳曰多聞而齊給鄭注云齊疾也蓋謂有口辨即讒  
說也史公行為偽者偽亦爲也漢景君碑云殘偽易心  
殘殄聲相近疑卽用此文言其說齊給而行貪殘也震  
動師衆皆釋詁文史公作振者廣雅釋詁云動也馬注  
見吳志注云殄絕者詩傳文鄭注見史記集解云色取  
仁而行違者論語顏淵篇文讒說是巧言令色也殄行  
是行違也違者邪也史記正義云言畏惡利口讒說之  
人兼殄絕姦偽人黨恐其驚動  
我案是以殄偽對聖讒說爲文  
命汝作納言夙夜出納

朕命惟允注史遷納作入允作信鄭康成曰納言如今

尚書管王喉舌也疏史公出納作出入者漢書百官表

言如今尚書管王之喉舌也允信釋詁文鄭注見北堂書鈔設官部云王喉舌者詩蒸民云出內王命王之喉

舌帝曰咨汝二十有二人欽哉惟時亮天功注史遷咨

作嗟欽作敬亮作相功作事馬融曰稷契臯陶皆居官

久有成功但述而美之無所復救禹及垂已下皆初命

凡六人與上十二牧四嶽凡二十二入鄭康成曰自咨

十有二牧至帝曰龍皆月正元日格於文祖所敕命也

**疏**二十唐石經作廿史公欽為敬者釋詁文亮為相者釋詁云亮相道也詩釋文引韓詩云亮相彼武王亮相

也功爲事者釋詁云績事也績功也馬注見史記集解云稷契臯陶皆居官久者棄爲后稷契作司徒臯陶作士皆在堯時上文鄭注亦云此三官是堯時事也鄭注見書疏云鄭以爲二十二人數父折伯與朱虎熊羆不數四岳與馬異案此說是鄭亦以朱虎熊羆爲二臣也云格于文祖所敕命者謂敕命於明堂盛德篇云明堂天法也故三載考績三考黜陟注史遷說爲三歲一考云亮天功

功三考黜陟疏史公以三考黜陟爲句者白虎通考黜疏爲云諸侯所以考黜何王者所以勉賢

抑惡重民之至也尚書曰三載考績三考黜陟又云所以三歲一考績何三年有成故於是賞有功黜不肖尚書曰三載考績三考黜陟漢書李尋傳尋對災異曰經曰三載考績三考黜陟此皆如史公斷句孔安國古文說也春秋繁露考功名云考績之法考其所績也考試之法大者緩小者急貴者舒而賤者促諸侯月試其國州伯時試其部四試而一考天子歲試天下三試而一考前後三考而黜陟命之曰計白虎通又云尚書曰三

考而黜陟命之曰計白虎通又云尚書曰三



考黜陟先削地後黜爵何爵者尊號也地者人所任也今不能治廣土衆民故先削其土地也公羊隱八年疏

引書傳云三年幽明庶績成熙史遷幽明為遠近庶一使三公黜陟

作衆績作功熙作興熙史公幽明為遠近讀與庶績成熙為句大傳云書曰三載考績

三考黜陟幽明其訓曰三歲而小考者正職而行事也九歲而大考者黜無職而賞有功也一之三以至九年

天數窮矣陽德終矣積不善至於幽六極以類降故黜之積善至于明五福以類相升故陟之皆所自取聖無

容心也是以幽明上屬為句漢書谷永傳永對曰經曰三載考績三考黜陟幽明是亦以幽明上屬為句今文

說分北三苗也鄭康成曰流四凶者卿為伯子大夫為

男降其位耳猶為國君故以三苗為西裔諸侯猶為惡

乃復分析流之謂分北西裔之三苗也北猶州也

苗似非竄三危者韓詩外傳云當舜之時有苗不服其  
不服者衡山在南岐山在北左洞庭之陂右彭澤之水  
由此險也以其不服禹請伐之而舜不許曰吾喻教猶  
未竭也久喻教而有苗民請服案其事見淮南子鹽鐵  
論說苑諸書堯時三苗已竄三危此有苗不服在楚荆  
州之地是舜時三苗非堯時所竄也故呂氏春秋召類  
篇云舜却有苗更易其俗淮南兵畧訓云舜伐有苗修  
務訓舜南征三苗道死蒼梧注云三苗之國在彭蠡舜  
征有苗而死因葬焉書說舜曰陟方乃死蒼梧於周南  
越之地今為郡分北者即呂氏春秋所為却也說文云  
穴分也从重入鄭注見史記集解書疏及吳志注云卿  
為伯子大夫為男降其位者孟子萬章篇云天子之卿  
受地視侯大夫受地視伯則卿為伯子大夫為男是降  
其位也云分析流之書疏引析作北當從史記集解作  
析檀弓疏引張逸蒼焦氏云初竄西裔後分之在南野  
江氏聲云蓋三苗為西裔諸侯其君一人其族類當復  
不少其在西裔猶相聚為惡故復分析流之分析即分

別也故云北猶別也北蓋重入之穴段君玉裁云說文云公从八厶八猶背也古北背通用韋昭注吳語云北古之背字許君云八別也象分別相背之形又云八猶背也是北亦可訓背不必穴字

舜生三十徵庸三十在位五十載陟方乃死

**注**

史遷說為舜年二

十以孝聞年三十堯舉之年五十攝行天子事年五十

八堯崩年六十一代堯踐帝位踐帝位三十九年南巡

狩崩於蒼梧之野葬於江南九疑是為零陵鄭康成讀

此經云舜生三十謂生三十年也登庸二十謂歷試二

十年在位五十載陟方乃死謂攝位至死為五十年舜

年一百歲也

**疏**

史公云年三十堯舉之此生三十而徵用也年五十攝行天子事此徵庸二十

而在位也年五十八堯崩此所謂二十有八載放勳乃  
殂落也年六十一代堯踐帝位此三年過密之後乃踐  
帝位也踐帝位三十九年南巡狩崩於蒼梧之野此在  
位五十載陟方乃死也大戴禮五帝德云二十以孝聞  
乎天下三十在位嗣帝所五十乃死論衡氣壽篇云堯  
典曰朕在位七十載求禪得舜舜修三十一歲在位堯退  
而老八歲而終至殂落九十八歲未在位之時必已成  
人今計數百有餘矣又云舜生三十徵用三十在位五  
十載陟方乃死適百歲矣段君玉裁云論衡舜徵三十  
歲在位及徵用三十兩三十字誤當作二十史記集解  
徐廣引皇甫謐云舜以堯之二十一年甲子生三十一  
年甲午徵用七十九年壬午卽真百歲癸卯崩太平御  
覽八十一引帝王世紀曰舜年八十卽真八十三而薦  
禹九十五而使禹攝政攝五年有苗氏叛南征崩于鳴  
條年百歲此甲子不足信偽傳云舜壽百一十二歲增  
多一十二歲與史記論衡不同誤計之也陟方者史公  
說爲巡守案巡狩至五岳而止此至蒼梧者蓋此行分  
北三苗且行九歲之大考也高誘注淮南云書曰舜陟

方乃死舜死蒼梧葬於九疑之山在蒼梧馮乘縣東北  
零陵之南千里也史記集解引皇覽云舜冢在零陵營  
浦縣其山九谿皆相似故曰九疑案馮乘在今廣西賀  
縣北一百廿里地理志零陵郡營道九疑山在南營道  
縣在今湖南道州西九疑  
山在寧遠縣南六十里

堯典第一下終